

# Revelation

## Jesus-el ileyel, nthakenharl irreyneyenh arrwekel Angka nhenhan alakenh aynteyel

Artwamp anyentel John-el angka nhenhan ingkwernew pip-warl. Ra anenh kwertengerl Jesus-wenh, Zebedee-wenh alerikwan.

John-an alhenh, angka mwerr-angker Jesus-akert ilerl-apenh. Rome-areny-rnem atyetyart-rnem ikwer-wety arlkarerrenh, rernemap renh thwenew apmer akely-warl Patmos-warl, ahern ingwer-warl kwaty alay ampep-warl. Rap anenh tyaylel-apeny. Rarl ikwer-itwew anenh, Jesus ikwer angkew altyerr-angkwarr. John-elap ingkwernew-anem altyerr renh pip-warl. Alakenh-anyem Christian ingwer-rnemel iterl-areyew, alakenh-anyemarl irreyenh ingwer-ingwer.

Ikwereng-arey Rome-areny-rnemel Christian-rnem irrwernenh artewentyel inngey, ingwer-rnem-then atwenh ipmew-antey. Apmwarl ayntenheng-arey, Christian-rnem arrkernelhenh-antey, Akngey-wenh-angkwarr apent-aynteyew. Alakenh-wety Akngeyel angka nhenh anthew John-ew, rernemaw rlterrkerreyew-awaty, ater-weny anaynteyew.

Angka nhanyem picture-talk-akert. Akngeyel Christian-rnem ilew, angka irrpety-angkwarr

renh-rnem akalty-antheyew.

Namp 1: Arraylenty-rnem artwa apmwernem-thenan aley aneyel, rernemap Akngey-wetyarl ilperteleyel akngerr. Rernemap ingwer-rnem pwerep-antheyel, Christian-rnem irrwern-aynteyew. Apmwernemel apek renh-rnem ipmew atwem.

Namp 2: Jesus Christ-an ilkwarl ingkerr-angkwarr. Ingwer-ingweran ra ipmew atweyenh Akngey-wetyarl arlkarerreyel-rneman.

Namp 3: Ahern-thenarl alker-then ywerreyelpeyenh-penhel, Akngeyel ahern ngwampeny-then alker ngwampeny-then arnwarneyenh-anem. Ikwerenh-rnem ahern awankeny-itwewarl anenheng-arey, rernemarl rlterrk ikwerant iterrenh, Akngeyel renh-rnem ineyenh, akngeyneyenh, ikwer-itwel aney-alpeyew intem-antey. Rap ikwerenh-rnem ineyenh, akngeyneyenh, ikwer-itwel aney-alpeyew intem-antey, rernemarl rlterrk iterrenh ikwerant.

*Angka nhenhelan ileyel, ingwer-ingwer ahern nhenh-itwew aynteyenh*

<sup>1</sup> Akngeyel angka anthew Jesus Christ-ew, ra ileyew ikwerenh-rnemew, alerl-antey ingwer-ingwer alakenharl aynteyenh-akert. Rap antyerl ikwerenh thwenew warrkenh ikwerenh-warl atyeng-warl John-warl. Antyerl ra ilek-ilek

lwewarrernew atyeng. <sup>2</sup> Atha nhenh ingkwerneyel, ilek-ilek atharl arew-penh. Angka nhenhan Akngey-wenh, Jesus-elarl lwewarrernew antyerl ikwer. <sup>3</sup> Ingwerentyel angka nhenhan ilerl-anenty, Akngeyel renh arntarnt-arayntem. Ingwerentyan awelhenty mwanty iterremel, Akngeyel renh arntarnt-arayntem arrpemar. Arlta arrer-anem irreyel.

*John-el angka nhenhan ingkwerneyel Akngey-wenh-rnemew*

<sup>4</sup> Ya, alakenh atha pip nhenh ingkwerneyel Christian-rnem-warl, apmer Asia-ampeny-warl. Arrantherrarl aneyel apmer 7-itwel, arrantherrap Akngey-warl-athek akarrerrem apmelerr, renh nakeyew.

Akngey ran arrwekeleny anenh, ahern nhenh arnwarney-angenhel-antey. Iteth ra aneyel, iteth ra anayntem intem-antey. Atha nhanyem katy ayerneyel arrewantherr, ra athamerremel arntarnt-araynteyew. Alakenh-angkwarran arrantherr mwerrant-arey anaynteyew. Inwengrnem 7 Akngey arrerentyarl aneyel, rarl chair ikwa atyetyart-wenh-itwew. Renh-rnem atha ileyel, arrewantherr katy ayerneyew, Akngey ra athamerremel arrenhantherr arntarnt-araynteyew. <sup>5</sup> Ya John-el atha Jesus Christthen ayerneyel. Rant iley-angker Akngey-wenh-angkwarran. Atha renh ayerneyel arrewantherr, ra athamerremel arntarnt-araynteyew, arrantherraw mwerr-angkwarr anaynteyew. Jesus-tangkwel Akngeyel itethelew ipmepenh. Ahern nhenh-itwewan artwa alkenh-rnem apmer arrpanenh-areny aneyel. Jesus

Christ alkenharl ingkerr-angkwarr ahern nhenh-itwew aneyel.

Anantherr ingkerrenh intwemel-alhenh Akngey-wety. Jesus-anap aletharl ilkelhenh anewantherr. Ra katy ilwew, apmwa akngeyew anantherr-wety. Arrnga ikwerenh thelew, anenhantherrenh angkepeleyew Akngey-warl-ilwengk. <sup>6</sup> Aleyan Jesus-el anenhantherrenh arrernew, warrkenh Akngey-wenh-rnem-anem anaynteyew. Nakeyn-aynteyew Jesus renh, rarl alkenh aneyel intem-antey! Ya, arratyarl yanh!

<sup>7</sup> Awelhenh-arey atyeng arrantherran! Ingwer-ingweran Jesus apey-alpeyenh ahern nhenh-warl. Arrantherrap renh areyenh, rarl apey-alpeyenh kwenpay-angkwarr. Ingkerrelan areyenh anngel. Weth-rnemel renharl atwew-rnemel-then areyenh arrpemar. Ingkerrenh apmer arrpanenhel artnalhelerreyenh ikwer. Ya, arraty wenh! Alakenh-anyemarl aynteyenh!

<sup>8</sup> Akngey alakenh angkeyel, “Ayengan arwekel anenh. Awank-akerr ayeng anenh, ahern nhenhan arnwarney-angenhel-antey. Aleyan ayeng iteth-anteyarl aneyel. Ahern nhenh-then alker nhenh-then aleth-antey ywerrenheyenharl, ayengan iteth intemarl anerl-aneyenh. Ayengan *Atyetyart Ilkwa Ingkerrenhew* aneyel.”

*John-el Jesus areyel altyerr-angkwarr*

<sup>9</sup> Ayeng John, Jesus-wenh warrkenh arrantherr-apeny. Ra alkenharl aneyel warrkenh ikwerenh-rnemew. Ingwer-rnemel ayenh irrwerneyel arrenhantherrenh-apeny. Kel mwerrarl alakenh. Anantherr renh

apent-ayntem angkeperrey-angenh, rarl anenhantherrenh riterrkel-ayntem. Ayeng alhenh, angka mwerr-angker Jesus-akert atha ilerl-apenh. Rernem ayenh antwerrkew, thwnew-anem apmer nhenh-warl Patmos-warl. Apmer ahern akelyarlap ran, kwaty alay ampep-itwew, tyayl-apeny.

<sup>10</sup> Weth-antey Akngey-wenh arltel ayeng angkenh ikwer-warl-ilwengk. Ra Inweng ikwerenh thwnew arawerrng riterrk-akert atyeng-warl. Athap awew ingwerenty-anem, artep-angkwarr angkey-alhenty. Rap atayel inngey angkey-alhew terampet-apeny. <sup>11</sup> Rap atyeng angkew, "John-ay! Atha ngkweng ilek-ilek lwewarrerneyew. Pip ina. Ingkwerna ilek-ilek nhaym, atharl ngkweng lwewarrernem. Ntwap thwena Akngey-wenh-rnem-warl, apmer 7-areny-rnem-warl. Rernem Akngey-warl-athek akarrerrem apmelerr. Thwena Ephesus-areny-rnem-warl, Smyrna-areny-rnem-warl, Pergamum-areny-rnem-warl, Thyatira-areny-rnem-warl, Sardis-areny-rnem-warl, Philadelphia-areny-rnem-warl, Laodicea-areny-rnem-warl-akerr. Thwena ingkerrew-antey."

<sup>12</sup> Athap artepang arew-anem. Atha areyew, angwenh atyeng angkeyelan. Athap arew-anem, ampwal-rnem 7 inngarl rtnenh, gold-penharl arnwarnew. Irrwerl-itwewan ikwer-rnem-itwew ayntenh irrkwernem anter olive-angketyarr, lherrmarl ampenh-akert. <sup>13</sup> Ampep-itwewan rtnenh Artwa Inngarl Akngey-wenh-apeny, arnkwa arlpenty-akert ingketyew-atety. Arnelty-angkwarran pilt gold-el-apenyarl

arrtyernenh. <sup>14</sup> Altan arlterel kwenpay-apeny. Annga atherran lherrmel-apenyarl arrtyernenh. <sup>15</sup> Ingkety atherran ampenh, ayen rwenp rwethey tyerrenty-apeny. Atayel ra angkenhan kwaty atnyerr anterrenty-apeny. <sup>16</sup> Rap antyarr 7 antwerrkenh itep arraty-ampenyel. Arrakerttheyan napp arlpenty-apeny tyerrelhenharl, arreylp atherr-angkwarrarl. Inngerrelan arrtyernenh ingkeny arlta ampepel-apeny.

<sup>17</sup> Atharl artepang aremel renh arew, ayengap kwenerremel aytnew ipmapeny. Itep arraty-ampenyel-anem ayenh arnew, rap angkew, "Atererrey-angenh. Ayengan arrwekel anenh. Awank-akerran ayeng anenh, ahern nhenhan arnwarney-angenhel-antey. Ahern nhenh-then alker nhenh-then ywerrenheyenharl, ayengan iteth intemarl anerl-aneyenh. <sup>18</sup> Ayengan iteth aneyel! Ayeng ilwew-tangkwel, aleyan ayeng intem-antey iteth-anemarl. Ingwer-rnem atha itetheleman, ingwer-rneman atha ipmemarl, rernem aynteyew ipmernem-itwelarl.

<sup>19</sup> Ya, John, ingkwerna ingkerrenh ilek-ilek, ntwarl arew altyerr-angkwarr. Ingkwerna, ilek-ilek arlta nhenhelarl ntwal arew. Ingkwerna, ingkerrenh nhanyem atha ngkwengarl lwewarrernew, ingwer-ingwerarl aynteyenh. <sup>20</sup> Ntwal areyel ampwal-rnem 7, gold-penharl arnwarnew-rnem? Atha anayntelem ngkweng, ntwal iterl-araynteyew. Rernem Akngey-wenhrnem ileyel, rernemarl akarrerreyel apmer 7-itwew. Iekarlap antyarr 7 nhenh-rnem, atharl antwerrkeyel itep arraty-ampenyel? Athap

ngkweng anayntelem arrpemar, ntwā iterl-  
araynteyew. Rernem ileyel antyerl-rnem 7-arl,  
rernemar Akngey-wenh-rnem arntarnt-areyel  
apmer 7 weth-rnem-itwew.”

## 2

### *Jesus-an angkeyel Ephesus-areny-rnemew*

<sup>1</sup> Irrkaty ran atyeng angkew, “Angka atyenh  
ingkwerneyew antyerlew, Christian Ephesus-  
areny-rnemar arntarnt-areyew. Ileyew renh  
alakenh: ‘Athan 7 antyarrarl antwerrkeyel itep  
array-ampenyel. Ayengap ampepel alheyel am-  
pwal 7 weth-rnem gold-penh lherrm-angketyarr-  
angkwarr. Ayengan angkeyel Ephesus-areny-  
rnemew-anem. Awelhenh-arey atyeng arran-  
therr!

<sup>2</sup> Athan arrenhantherrenh ingkerrenh  
iterl-areyel. Atha iterl-areyel, arrantherrarl  
atyeng warrkerreyel mwerr-angkwarr. Rlterrk  
ayntemeng-arey, arrantherr angkepperrey-  
angenharl. Arrantherran amperelemel  
alhem apmwel-ayetharl aneyel-rnem-wetyan.  
Ingwer-rneman iterrem-arrpantey, “Akngeyel  
anenhantherrenh rlwanew, alkenh aneyew  
Akngey-wenh-rnemew.” Arrangkwarrap  
ran. Arrantherran awelhew mwanty-  
antey iterl-aremel, rernemarl irrtywerremel  
ilenh. <sup>3</sup> Ingwer-rnemelan arrenhantherrenh  
irrwernenh, arrantherrarl ayenh apentenh-  
wety. Arrantherran angkepperrey-angenharl,  
ipmelhey-angenharl. Ayengan inkwerelheyel  
arrantherrew.

4 Athan arrenhantherrenh iltem-anem alyepel. Awank arrantherr atyeng-warl-ilwengktangkwel anthehew, arrantherrap atyeng ilkelhenh artewenty. Arrantherr ilkelherrenh artewenty arrpemarl. Aleyanap arrangkw-anem. Arrantherr atyeng arwa alyepel-anem ilkelheyel.

5 Arrantherr artewenty atyeng ilkelhenhtangkwel. Iylpelerrey-angenh-anem! Arrantherran atyeng iterrey-angenh-anem ingwer-rnemew-then. Angkeperrenh-arey artnemel apmwewety atyeng-warl-ilwengk, ayeng arrewantherr-warl alhewerr, rakerl-alpeyew ampwal arlpenty weth lherrm-akert. Irrkaty-angkwarr anayntenh-arey, arrantherrarl arrwekel-antey anenh-apeny. <sup>6</sup> Anyentinger-anem ayeng angkeyew arrewantherr. Akngerrel apenteyel artwa weth Nicolaus, apmwangkwarr alhemel. Arrantherran ikwerenh-angkwarrew ilkelhey-angenh, ayengarl aneyel-apeny. Alakenh iterremel arrantherr mwerr-angkwarrarl aneyel.

7 Arrantherran iylpakertarl! Awelhenh-arey mwanty-antey, Inweng Mwerr-angkerelarl ileyel-angkwarr Akngey-wenh-rnemew! Ingwerenty rlterrk apek rtnem arrenty-wenh-angkwarr-wety, rap alhewer alhem apmer atherrkeny-warl irrwerl. Apmer ikwer-itwewan arwerl anyent rtneyel itetheley-angker. Ingwerentyel arlkwem amern mwerr-angker ikwerenh, atharl Jesus anthem, rap iteth-anem anem intem-antey.' ”



Angka nhenhan antyerl ikwer, Christian Ephesus-areny-rnemaarl arntarnt-areyew.

*Jesus-an angkeyel Smyrna-areny-rnemew*

<sup>8</sup> Irrkaty ran angkew arrpemaarl, “Angka atyenh ingkwerneyew antyerlew, Christian Smyrna-areny-rnemaarl arntarnt-areyew. Ileyew renh alakenh: ‘Ayengan arrwekel anenh, ahern nhenh arnwarney-angenhel-antey. Ahern-then alker-thenan ywerrenheyenhan, ayengan irrkaty-antey anayntem. Ayeng ilwew-tangkwe, ayengap itetherrew ipmepenh. Aley ayeng angkeyel Smyrna-areny-rnemew. Awelhenh-arey atyeng arrantherr!

<sup>9</sup> Atha iterl-areyel, ingwer-rnemelaarl arrenhantherrenh irrwerneyel. Irrepernrnem arrantherr arrangkw aneyel manweny-then. Akngeyelan arrenhantherrenh anthew ilek-ilek arawerrng ikwerenh-akertelan, manan mentyarl. Atha iterl-areyel, ingwer-rnemelaarl ingkerterremel kwantheyel, apmwel-ayeth tyel-angkemel arrewantherr. Rernem nakelhemel ilelheyel Jew-rnem akwel. Rerneman irrtwyerremel ileyel, arrenty Satan-wenh-rnemaarl, renharl apenteyel-rnem. <sup>10</sup> Alerl ingwer-ingweran rlterrk innganemaarl ayntem arrewantherr. Atererrey-angenh. Satan-an iterreyel, arrenhantherrenh arrkerneyew, angkepeleyew Akngey-wenh-angkwarr-wety. Ran ikwerenh-rnem ileyenh, ingwerentyaman arrewantherr antwerrkeyew, tyayl-warl akwernemel arlta 10-ew-atety.

Arrenhantherrenhap artewentyel irrwamperl-anthaynteyenh, ipmew apek atwaynteyenh. Artewenty iterrey-angenh. Arranherr rlterrk-antey anaynteyew, atyengant iterremel, ipmelhey-angenh. Atharl itethelem ipmepenh, arranherrap atyeng-itwel-anem aney-alpem intem-antey.

<sup>11</sup> Arranherran iylpakertarl! Awelhenharey mwanty-antey, Inweng Mwerr-angkerelarl ileyel-angkwarr Akngey-wenh-rnemew! Ingwerenty rlterrk apek rtnem arrenty-wenh-angkwarr-wety, rap nthekwern ampey-angenh rwa ilkwitwew, intemarl ampeyel-itwew, ar-rangkw.' "

Nhenhan angka antyerl ikwer, Christian Smyrna-areny-rnemarl arntarnt-areyew.

*Jesus-an angkeyel Pergamum-areny-rnemew*

<sup>12</sup> Irrkaty ran atyeng angkew arrpemar, "Angka atyenh ingkwerneyew antyerlew, Christian Pergamum-areny-rnemarl arntarnt-areyew. Ileyew renh alakenh: 'Atha weth nayp arlpenty antwerrkeyel, arreylp atherr-angkwarrarl. Aley ayeng angkeyel Pergamum-areny-rnemew. Awelhenharey atyeng arranherr!

<sup>13</sup> Atha iterl-areyel apmer arrewantherrenh. Arrenty Satan alkenh aneyel apmer yanh-itwelan. Akngerrel yanh-areny-rnemel rernem renh apenteyelan. Arranherran arrangkwarl, rlterrkarl atyeng aneyel, ipmelhey-angenh. War-kenh anyent atyenhan anenh ikwer-itwew, itnan Antipas. Ran angka atyenh ilerl-apenh.

Weth-anteyan rernem renh awew, rernemap renh atwew ipmew-antey. Ikwereng-arey arrantherran rlterrk-antey anenh, arrantherrap angkeperrey-angenh-antey atyeng-wety, ar-rangkw. Ayengan arrantherrew inkwerelheyel.

<sup>14</sup> Athan iltem arrenhantherrenh alyepel. Ingwerentyaman arrewantherr apmwel-ayeth-angkwarr aneyel, angka Balaam-wenh awelhemel, rarl awank anenh-angkwarr-apeny. Angka yanhan iterl-areyel apek? Ran irrtwyerremel ilew artwa alkenh apmer Moab-arenyew, itna *Balak*. Balak ranem irrtwyerremel ilew Israel-wenh-rnemew, rernemaw apmwangkwarr anaynteyew. Rernem arnwarnenh ampwal apmwernem arwerl-penh apwert-penh-then, kwernerremel ikwer-rnemew, Akngeyew iterrey-angenh, arrangkw. Rernemap anthenh aker-rnem-then ampwal ikwer-rnemewan inngew-apeny. Anthewarl-penh rernemap ampernew-anem, arkwew-anem apmwel-ayeth-angkwarr. Balak rap angka Balaam-wenh ilew Israel-wenh-rnemew, mwerr aynteyew arelh artwa ingwer-wenh-akert iteng-apeny. Arengk-rnem-apeny rernem mpweny ayntenh, Akngeyew awelhey-angenh. Aley irrpetyap ingwerentyaman irrkaty-angkwarrarl alheyel, awelheyel Balaam-wenh angkew. <sup>15</sup> Ingwerentyelaman arrewantherr apenteyel artwa Nicolaus, angka apmwa ikwerenhew awelhemel. Balaam-then Nicolaus-then ratherranap irrtwyerremelarl angka ileyel atherr. <sup>16</sup> Intwemelerrenh-arey apmwewety! Amperrngerremel

angkeperrenhey-alpenh-arey atyeng-warl!  
 Akngerran angkeperrey-angenh apmwewety,  
 alerl ayeng arrewantherr-warl alhem, athap  
 renh-rnem atwem angka atyenhel, ayengarl  
 arrakert-angkwarr-they angkeyel. Angka  
 atyengan nayp-apeny, arreylp atherr-angkwarr-  
 apeny.

17 Arrantherran iylpakertarl! Awelhenh-  
 arey mwanty-antey, Inweng Mwerr-angkerelarl  
 ileyel-angkwarr Akngey-wenh-rnemew! In-  
 gwerenty rlterrk apek rtnem arrenty-wenh-  
 angkwarr-wety, athap renh anthem amern alker-  
 areny itnan *manna*. Aleyan amern nhenhan  
 nthakenh arey-angenh, athap anthem ingwer-  
 entyew, rernemarl ayenh apenteyelew. Athap  
 renh anthem apwert arlter alyelk. Athap  
 apwert ikwer-warl itnanem ingkwernem, itna  
 ingwer-anem. Ingkerrel itna renh iterl-arey-  
 angenh. Apwert arlter alyelkew-arteyel rant  
 iterl-arayntem.’ ”

Nhenhan angka antyerl ikwer, Christian  
 Pergamum-areny-rnemarl arntarnt-areyelew.

### *Jesus-an angkeyel Thyatira-areny-rnemew*

18 Irrkaty ran atyeng angkew arrpemarl,  
 “Angka atyenh ingkwerneyew antyerlew, Chris-  
 tian Thyatira-areny-rnemarl arntarnt-areyelew.  
 Ileyew renh alakenh: ‘Ayengan Akngey-wenh  
 Alerikwarl. Angka atyenh atha ileyel. Anngan  
 atyenh atherran ampeyel rwa lherrm-apeny. In-  
 gkety atyenh atherran ayen rwenp rnnter-rnter-  
 apeny, rwethey tyerrenty-apenyarl. Aley ayeng

angkeyel Thyatira-areny-rnemew. Awelhenharey atyeng arrantherr!

<sup>19</sup> Atha iterl-areyel, arrantherrarl aneyel-angkwarr. Arrantherr artewenty ilkelherremel aneyel, athamerremel ingwer-rnemewthen. Rlterrkkel atyeng iterremel warrkerreyel mwerr-angkwarr, angkeperrey-angenh, rlterrkarl ayntemeng-arey. Arrantherrarl atyeng inweng anthelhew-penh, mwerr atyeng warrkerrenh. Aleyan arrantherr warrkerreyel mwerr innganem atyeng.

<sup>20</sup> Athan iltem arren hantherrenh alyepel. Arrantherran arelh weth Jezebel tyarlewew, arrenhantherrenh akalty-antheyew, arrantherrarl Akngey-warl akarrerrem. Ranap irrtywerremelarl ilem. Ra ilelhem angkakert Akngey-wenh-arrpantey.

Ran ileyel, alhewer mpweny alhaynteyew arengk-apeny. Ran ileyel, alhewer aker arlkwaynteyew, ampwal arwerl-penhew apwert-penhew-then anthew-penharl.

<sup>21</sup> Akngerr-inger atha arelh renh ilew, angkeperreyew apmwangkwarr-wety. Ayengan mpwelhenh ywarn-antey, aley arrangkw-antey. Ran awelhey-angenh-antey alheyel.

<sup>22</sup> Alakenh-theyan atha renh arntety antheyenh, rap kwarnelherl-aneyenh. Ingwer-rnem ipmelheyew, ikwerenp mpweny aynterl-anewerr, rernem arntety irrewerr irrkaty-angkwarr. <sup>23</sup> Rapeny ingkerrenh atha ilwerl-atheneyenh. Akngey-wenh ingkerrelap areyengan, rernemap iterl-areyengan, atharl

kanper ingkerrenhan iterl-areyel. Atha iterl-areyel, ingkerrenharl iterreyel-angkwarr. Ingwerenty apmwangkwarrarl aneyel, atha renh thwenem, rwa ilkwewarl aleth ampeyel-warlarl. Ingwerentyan atyeng-wety intwemelerremel apmwangkwarr alhem, ayengap ikwer awakelhemarl apmwa ikwer-rnem-penh. Ingwerentyelan ayenh apentemel arraty-angkwarrarl alhem, athap ilek-ilek mwerr-angker ikwer anthem, rarl ilek-ilek mwerr-angker mpwarem-apeny.

<sup>24</sup> Arelh Jezebel-wenh-rneman alakenh angkem: “Anantherr ilek-ilek iterl-areyel arrenty Satan-wenh-then.” Rerneman ilkwarl ilelheyel. Ingwer-rnemanap arrantherr awelhey-angenharl ikwer, rarl akalty-antheyel apmwangkwarr. Ayengap arrantherrew inkwerelheyel. <sup>25</sup> Iylpelerrey-angenh-antey! Apent-ayntenh-arey atyenh-angkwarr ipmelhey-angenh-antey, atyeng mpwelhemel, ayengarl apey-alpeyenhew.

<sup>26</sup> Ingwerenty rlterrk apek rtnem arrenty-wenh-angkwarr-wety, atyengarl warrkerreyel ipmelhey-angenh, athap renh-rnem arrernem alkenh apmer arrpanenhew ahern nhenh-itwel. <sup>27-28</sup> Akngey atyenhel ayenh-tangkwel alkenh arrernew apmer arrpanenhew. Aleyan athanem renh-rnem alkenh arrernem irrkaty-angkwarr. Ayengan anayntem alkenh ingkerrenhew arawerrng ilkwakert. Ingwerenty atyeng awelhey-angenh, ra renhan atweyenh, apwertelarl pweterl ngkweltyelem-apeny. Arlta ikwerelan atha renh antyarr alkerreylp

antheyenh, ra iterl-areyew, atharl renh alkenh-anem ilem.

<sup>29</sup> Arrantherran iyipakertarl! Awelhenh-arey mwanty-antey, Inweng Mwerr-angkerelarl ileyel-angkwarr Akngey-wenh-rnemew!’ ”

Nhenhan angka antyerl ikwer, Christian Thyatira-areny-rnemarl arntarnt-areyew.

### 3

#### *Jesus-an angkeyel Sardis-areny-rnemew*

<sup>1</sup> Irrkaty ran atyeng angkew arrpemar, “Angka atyenh ingkwerneyew antyerlew, Christian Sardis-areny-rnemarl arntarnt-areyew. Ileyew renh alakenh: ‘Athar inweng 7 weth-rnem Akngey-wenh-rnem atnyeneyel. Athap antyarr 7 weth-rnem atnyeneyel itep atyenhel. Aley ayeng angkeyel Sardis-areny-rnemew. Awelhenh-arey atyeng arrantherr!

Atha iterl-areyel, arrantherrarl aneyel-angkwarr. Ingwer-rneman iterreyel, arraty arrantherr ayenh apenterl-anenty-arrpantey. Arrantherran aneyel artwa ankwenp-ankwenp-apeny, ipmapeny. Aleyan arrantherr irrwerlap-aneyel, alperrarl kwaty-itwew irrwerlap-aynteyel-apeny. <sup>2</sup> Atyekerrenh-arey! Arrantherr warrk mwerr arnwarnenh, arwa alyepel-antey. Kel atha arew. Akngey atyenhanap arrewantherr inkwerelhey-angenh-anem. Arrantherran mwerr anperarl arnwarneyew, warrk arrewantherrenh arrangkw-anem irrewerrarl! <sup>3</sup> Arrantherr iterl-areyel, angka renharl awew awank-akerr. Arrantherran

awelhew-tangkwel. Aleyan iylpelerrey-angenh-antey. Angkeperrenhey-alpeyew amperrngerremel, Akngey-wenh angkant apentemel. Arrantherr iylpelant awemel anenty, arrantherrap apal arnernkey anerl-aneyenh, ayengarl nhew arrer aremerreyelpeyenh.

<sup>4</sup> Irrpetyap arrantherr awelheyel-antey Akngeyew, iylpelerrey-angenh ikwerenh-angkwarr-antey aneyel. Arrantherr irlwart-anem aneyel. Akngey ran inkwerelheyel arrewantherr, arrantherrap atyeng-itwel alherl-aneyenh arnkwa arlter-akert. <sup>5</sup> Ya, ingwerenty rlterrk apek rtnem arrenty-wenh-angkwarr-wety, rap aylpem arnkwa arlterel arrpemar. Itnernem arnkwa arlter-akert-rneman atha ingkwernew pwek impen atyenh-warl itna Akngey-wenh-rnem-akert-warl. Rernemap atyeng-itwel aney-alpeyenh intem-antey. Nthekwern itnernem iparey-angenh-anem. Arlta ikwerel, Akngeyelarl ingkerrenh ayerneyenheng-arey, ayengan angkeyenh Akngey atyenhew antyerl-rnemew-then alakenh: "Nhenh-rnem atha iterl-areyel!"

<sup>6</sup> Arrantherran iylpakertarl! Awelhenh-arey mwanty-antey, Inweng Mwerr-angkerelarl ileyel-angkwarr Akngey-wenh-rnemew! "

Nhenhan angka antyerl ikwer, Christian Sardis-areny-rnemar arntarnt-areyew.

*Jesus-an angkeyel Philadelphia-areny-rnemew*

<sup>7</sup> Irrkaty ran atyeng angkew arrpemar, "Angka atyenh ingkwerneyew antyerlew,



Christian Philadelphia-areny-rnemar! arntarnt-areyew. Ileyew renh alakenh: 'Ayengant anyent mwerr. Ayengant anyent array. Atha anyentel key arrengey David-wenh renhan antwerrkeyel. Key rantap altywereley-angker arriw anyentant. Arriw ikwer-angkwarran iwerr aynteyel Akngey atyenh-warl. Athant altywereleman, nthekwern ingwerentyel akentey-angenharl. Athant akentem, nthekwern ingwerentyel altywereley-angenharl. Aley ayeng angkeyel Philadelphia-areny-rnemew. Awelhenh-arey atyeng arrantherr!

<sup>8</sup> Atha iterl-arey, arrantherrarl aneyel-angkwarr. Atha iterl-arey, arrantherrarl alhengkerrerrrew-anem aley. Aleyan arrantherrap intem-antey angka atyenhew awelheyel. Arrantherran ingwer-rnem iley-angenharl, "Anantherran Jesus iterl-arey-angenh." Alakenh-angkwarran atha altywerelew arriw renhan, arrantherraw aylpenheyew. Nthekwern ingwerentyel akentey-angenh arrantherr-wety. <sup>9</sup> Atha ingwer-rneman iterl-arey, Jew-rnem-arrpanteyarl ilelheyel-rnem. Rernem irrtwyerremel ileyel, apmwangkwarr akalty-anthemel. Akngey-wenh-rnem-arrpantey, arrangk, arrenty Satan-wenh-rnemarlap rerneman. Athap renh-rnem ilem, irrtwyerremelarl ileyel-rnem, rernem kwenerremel nakeyew arrenhantherrenh. Rernemap angkeyenh, "Jesus-elan arrenhantherrenh arntarnt-areyel mwerr-angkwarr." <sup>10</sup> Arrantherran atyeng rltarrk rtenh, atyeng mpwelhemel,

ayengarl apey-alpeyenhew. Arrantherr atyengwety intwemelerrey-angenh-antey. Athan arrenhantherrenh iwerl-alhey-angenh-antey, rlterrkarl aynteyenheng-arey ingkerrenhew ahern nhenh-itwel ingwer-ingwer.

<sup>11</sup> Ya, ayengarl ingwer-ingwer apey-alpeyenh-wety! Arraty-angkwarr-antey ayenh apent-ayntenh-arey, aleyan arrantherr aneyel-angkwarr-apeny. Athap mwerr-angker anthem arrewantherr. Arrantherr apek ayenh apentey-angenh, atha nthekwern mwerr-angker anthey-angenharl. Athan ingwerentyewantarl anthem.

<sup>12</sup> Ya, ingwerenty rlterrk rtnem arrenty-wenh-angkwarr-wety, athap renh rnkernem apwert rlterrk arlpenty-apeny, warl Akngey atyenh-wenh-warl. Rap aney-alpem irrngerney intem-antey, warl renh iwerl-alhey-angenh. Athap ingkwerneyenh itna Akngey atyenh-wenh ikwer-warl. Irrkaty-angkwarr atha ingkwerneyenh itna *Jerusalem Ngwampeny* ikwer-warl, Akngey-wenh tawen-penh. Ingwer-ingwer Akngeyel atwarrelheleyenh tawen renh Jerusalem alker irrwerl-they. Athap ingkwerneyenh itna ingwer-anem atyenh ikwer-warl. Itna renhan iterl-arey-angenh-antey.

<sup>13</sup> Arrantherran iylpakertarl! Awelhenh-arey mwanty-antey, Inweng Mwerr-angkerelarl ileyel-angkwarr Akngey-wenh-rnemew! ”

Nhenhan angka antyerl ikwer, Christian Philadelphia-areny-rnemarl arntarnt-areyew.

*Jesus-an angkeyel Laodicea-areny-rnem-warl*

<sup>14</sup> Irrkaty ran atyeng angkew arrpemar, “Angka atyenh ingkwerneyew antyerlew, Christian Laodicea-areny-rnemar arntarnt-areyew. Ileyew renh alakenh: ‘Atha anyentel angka Akngey-wenh arraty iley-angker. Athan inngarl ileyel. Ayeng alkenh aneyel ingkerrenhew, rarl arnwarnew-rnemew. Aley ayeng angkeyel Laodicea-areny-rnemew. Awelhenh-arey atyeng arrantherr!

<sup>15</sup> Atha iterl-areyel, arrantherrarl aneyel-angkwarr. Arrantherr iterreyel, arrantherr ayenh arraty apenterl-anenty-arrpantey. Arrangkwarlap ran! Arrantherran arwarl irrwerlap-aneyelarl, kwatyel alperr irrwerlap-aneyel-apenyarl. Arrantherr innga ilkelhemel ayenh apentey-angenharl. Nthakenh atha arrenhantherrenh ileman? <sup>16</sup> Pwertay mwantyan-antey! Nthakenh alakenh arrantherr apenterl-aney-angenh. Atha arrenhantherrenh iwewerr, apelh arrakert-they iweyel-apeny. <sup>17</sup> Arrantherr iterreyel, ayenharl arraty apenterl-anenty. Arrangkwarlap ran! Arrantherr ilerreyel, “Mwerr-angkwarr anantherr ingkerrenh anerl-aneyel, ilek-ilek-then man-then atnyenemel.” Arrantherranap apatemel angkeyel. Irrepernrnem! Inngan arrangkwarl atnyeneyel! Arnkweweny aparrng anerl-anenty-apeny. Nyerrelarlap alakenh! <sup>18</sup> Awelhenh-arey atyeng! Angkeperremel ayenh ayernemel, mwerr-angker gold ingwer-lkwer inngethen antheyew, mwerr man ilkwangkwarr-wetyarl. Alakenhaymanap ilek-ilek mwerr-angker atnyenerl-anenty-apenyarl. Ayenh ayernenh-arey, arnkwa arlter

antheyew, arrantherr aylpeyew, nyerrerrewerr. Aparrng-wety ayenh ayernenh-arey, anter mwerr-angker antheyew apernelheyew-arelh, arrantherr anaynt areyew-ayteng.

19 Ayengan ahelerreyel arrewantherr, ayengap ilkelheyel-anteyarl arrewantherr artewentyel atyenh-angkwarr. Alakenh-anyemarlapan ran. Ayengarl ilkelheyel-rnem atha iltem athamerremel, rernem akaltyerreyew-awaty, arraty-angkwarr anaynteyew. Alakenhaym atha arrenhantherrenh ileyel, mwanty angkepperreyew apmwewety atyeng-warl.

20 Awelhenh-arey atyeng! Ayengan rtneyel arriwel rltar-atwemel, alakenh arlkemel, "Altywerelenh-arey atyeng! Ayeng aylpenheyew arrewantherr-warl. Anantherr inkwerelhelemel anaynteyew, amern arlkwemel."

21 Ya, ingwerenty rlterrk apek rtnem arrenty-wenh-angkwarr-wety, athap renh alkenh-anem arrernem atyeng-itwel. Ayengarl anenheng-arey ahern nhenh-itwel, arrenty el rlterrk atyeng arnwarnenh. Ayenganap rlterrk-anteyarl ikwer-wety rtnenh. Atharl renh antengelew-penh, ayengap aney-alpew Akngey atyenh-itwel-anem chair mwerr-angker-itwel. Aleyan aylak aneyel alkenh-anem ingkerrew. Ingwerenty rlterrk apek rtnem arrenty-wenh-angkwarr-wety, rap alkenh-anem aney-alpem atyeng-itwel, arntarnt-aremel ingkerrenh.

22 Arrantherran iyipakertarl! Awelhenh-arey mwanty-antey, Inweng Mwerr-angkerelarl ileyel-angkwarr Akngey-wenh-rnemew! "

Nhenhan angka antyerl ikwer, Christian Laodicea-areny-rnemarl arntarnt-areyew.

## 4

*John-el apatemel altyerr-angkwarr areyel, irrwerl-areny-rnemelarl Akngey nakedel*

<sup>1</sup> Ikwer-they athap altyerr ingwerel-ayeth-anem arew. Arriw altywer-anem irrew alker-itwel. Irrkaty wetharl ahenty terampet-apeny angkenty, atharl arrwekel awew, ranem atyeng angkey-alhew arrpemarl. Rap angkew, "Apetya! Atha ngkweng lwewarrerneyew, nthakenharl aynteyenh ingwer-ingwer."<sup>2</sup> Arwapeny Akngeyelan Inweng ikwerenh thwenew arawerrng rlterrk-akert atyeng-warl, rap ayenh arrer-apeny-anem akngeynew, Akngey rarl aneyel-warl. Athap arew irrwerl-itwew chair ilkwanem. Chair ikwer-itwew ingwerenty anenh.<sup>3</sup> Rap arrtyernenh apwert mwerr-angker alkeny-alkenyel-apeny. Mpwelarrel arrtyernemel amperelelhew chair renh.<sup>4</sup> Chair 24 ingwer-rnemelan amperelelhew chair ilkwa renhan. Chair ikwer-rnem-itwelan anenh artwa ampwa alkenh-rnem 24 arnkwa arlter-akert. Akapwert-itwelan rernem ampwal mwekart-apeny atyetyart-wenh atnyenenh, gold-penharl arnwarnew.<sup>5</sup> Chair ilkwa ikwer-theyan awely-awelyan arrkenh arwerlk alkenh-akert. Lherrm 7 ampenh arrwekel-ampeny arrtyernemel. Rerneman inweng 7-an Akngey-wenh-rnemarl.<sup>6</sup> Kwaty-apeny rtnenh chair ilkwa arrwekel-ampenyel. Ranap glass-apenyarl, kwatyarl

arlan rtneyel-apeny, irlwart anaynt arey-angker ikwer-angkwarr.

4 ingwer-rneman rtnehh chair ikwer arrerenty, atnwenth iteth-rnemar. Rernemanap annga akngerr-akert; artep-itwew, arnelty-itwew, akngerr inngey. Anyent ingweran rtnehh arraty-ampeny chair-itwel, ingweran ayleng-ampeny, ingweran ingkern-ampeny, ingweran arrwekelarl. 7 Anyent ingweran lion-apeny, ingweran pwelek-apeny, ingweran inngey artwapeny, ingweran irrety-apenyarl, alkerelerrenh alker-itwel. 8 Aympehh-akert-rnemarlap rerneman. Aympehh atherr atnyeney-angenharl rerneman, arrangkw. Aympehh 6-akert rerneman. Aympehh-itwewan annga akngerr rernem atnyenenh, irrwerleng-angkwarr-then kweneng-angkwarr-then, arlka ingkerr-angkwarr. Rernemap aylelherrenh intem-antey arltel-then kwenyel-then alakenh:

“Mwerr-angker, mwerr-angker, mwerr-angker!  
 Ingkart Akngey Atyetyart Ilkwa Ingkerren-  
 hew!

Ran arrwekel anenh, ingkerrenh arnwarney-angenhel-antey. Aley ra iteth aneyel. Ahern-then alker-then ywerrenheyenharl, ran iteth anayntem intem-antey!”

9-10 Aley rernem aylelherreyel-antey, renh nakemel mwerr-angker antwemel, rarl aneyel chair ilkwa ikwer-itwel. Rernemar aylelherrem-angkwarr, artwa ampwa alkenh 24 weth-rneman kwernerrem ikwer-warl, rarl iteth aleth-

antey aneyel-warl. Rerneman aylwem amp-wal mwekart-apeny atyetyart-wenh gold-penh ikwer-rnem-wenh, arrwekel-ampeny chair ilkwa ikwer-itwel arrernemel, alakenh angkemel:

11 “Akngey ngan Atyetyart alkenh anewantherrenh! Arrwekel awank-akerr ngantey iterrew, ahern-then alker-then arnwarneyew, ingkerrenh aleyarl ayntem.

Ntwant arawerrng alkenh atnyeneyel. Alakenhaym-they anantherr ngenh nakeyel, alkenh mwerr-angker ngarl aneyel.”

## 5

### *Pip ataperrelewarl yep-yep akely-then*

<sup>1</sup> Ikwer-penhan atha altyerr-itwew-anem arew, irrkaty wetharl anenh chair ilkwa mwerr-angker ikwer-itwew. Itep arraty-ampeny-itwelan ra atnyenenh pip arlpenty ataperrelewarl. Pip ikwer-itwelan angkarl ayntenh arrwekel-ampeny-itwel ingkern-ampeny-itwel-then. Nthekwern arey-angenh, ankerel-apeny 7-arl akentemel rlterrkewew, nthekwern renh arlpimpeley-angenh. <sup>2</sup> Athap antyerl alkenh arew, rarl angkenh atayel alakenh: “Angwenharl ran, Akngeyelarl renh rlwanew, anker-apeny-rnem akeyew, pip nhenh arlpimpelemel akenteweyewan? Artwa mwerrelant akentewey-angker!” <sup>3</sup> Ingkerrenh ahern-areny-rnem-then, ahernel kweneng-areny-rnem-then, irrwerl-areny-rnem-then

rernem ywarn iterremel ingwerentyew nthwenh, pip renh akenteweyew, rernem areyew. <sup>4</sup> Atharl arew-penhan, ayengap artnew artewentyel-anem. Rerneman nthwew ywarn-antey artwa mwerrew, ra akenteweyew pip renh, rernem areyew. <sup>5</sup> Ampwa alkenh anyent atyeng angkew, “Artney-angenh! Nhak araw! Yanharl arawerrng ilkwakertan, ran Layen Judah-wenharl. Arrengikwan ikwerenh David-arl. Ran ingkerrenh antengelew. Rant anyentel akentewey-angker.” -

<sup>6</sup> Ikwer-theyan atha arew yep-yep akely, rarl rtnenh chair ilkwa mwerr-angker arrerenty. Atnwenh iteth 4 weth-rnem, 24 alkenh weth-rnem-then rernem rtnenherrenh, amperelemel yep-yep akely renh. Athap arew yep-yep renh, ayengap iterrew, “Kwerrm yanh-rnem-anem ara! Renhan ipmew-antey atwewarl apekarl, rap itetherrenhey-alpew-anem.” Ra atnyenew rewely 7 annga 7-then. Anngernemanap inweng 7 Akngey-wenh-rnemar, renh-rnemar thwe-new apmer arrpanenh-warl ahern-warl. <sup>7</sup> Chair ilkwarenyel pip renh-antey antwerrkenh itep arraty-angkwarrrel. Yep-yep akely ran arrer-apeny-anem alhew, pip-anem inemel ikwer-they. <sup>8</sup> Atnwenh iteth-rnem 4 ampwa alkenh 24-then rernem kwenerrew yep-yep akely ikwerel, atnertel-ayeth ayntemel. Rernemap antwerrkenh ampwal ketay-apeny, irrkwethen gold-penh. Irrkwernem-they kwert mwerr-angker itntenh Akngey-warl-ilwengk, renh irrngerney-anthaynteyew. Ikwerenh-rnemar angkem ikwer, ran irrngerney irremarl, kwert mwerr-



angker ikwerarl ra irrngerney irrem-apeny.  
 9 Rernemap song ngwampeny aylelherrenh yep-  
 yep akely ikwer-warl-ilwengk, renh nakemel:

“Ngant anyent mwerrarl. Ntwant anyentel iney-  
 angker pip renh akentewemel!

Nga katy ilwew, arrnga thelemel ahern-areny-  
 rnemew.

Alakenh-anyem ntwa akngerr payemelemel  
 angkepelew apmer arrpanenh-they, angka  
 ingkerrenhew, irrpwerl-thenew, arlter-  
 thenew, arrkay-rnemew-then.

Ntwap renh-rnem angkepelew Akngey-warl-  
 athek, rernem anaynteyew ikwerenh-  
 angkwarr.

10 Aleyan Akngey alkenh ikwer-rnemew. Rerne-  
 man irrngerneyarl aneyel, ikwer warrker-  
 remel.

Rernemap alkenh-anem aneyenh intem-antey,  
 arntarnt-aremel apmer arrpanenhew.”

11 Athap arew chair ilkwa renh arrpemarl. At-  
 nwenth iteth 4 weth-rnem-then alkenh 24 weth-  
 rnem-then rernem rtnenherrenh-antey. Antyerl-  
 rneman rtnenherrenh, renh-rnem amperel-  
 hemel, akngerr inngel. Nthekwern count-  
 emeley-angenh, arrangkw. 12 Rerneman atayel  
 aylelherrenh alakenh-anyem:

“Yep-yep akely renh nakaynteyew! Renharl  
 ipmew-antey atwew, ranap mwerr-angker  
 inngarl!

Alkenharlap ran, arawerrng ilkwakert, alkenh  
 inngarl aneyel apmer arrpanenhew!  
 Ran rlterrk, akalty, arraty inngarl iterreyel,  
 ingkerrenh iterl-areyel!”

<sup>13</sup> Ikwer-penhan atha awew, ingkerrenharl  
 aylelherrenh. Ingkerrenh ahern-areny-rnem-  
 then, ahernel kweneng-areny-rnem-then,  
 kwaty-areny-rnem-then, alker-areny-rnem-then  
 rernem aylelherrenh atayel alakenh-anyem:

“Ingkerrenhelan renh nakeyew, chair mwerr-  
 angker-itwelarl aneyel, yep-yep akely  
 renh-then nakemel!  
 Ratherranap mwerr, arawerrng ilkwakert.  
 Alkenh inngarl ratherr aneyel apmer  
 arrpanenhew!  
 Anantherr kwenerr-aynteyew ikwer-atherr-  
 warl-ilwengk, aleth aylelherremel, renh-  
 atherr nakemel, ipmelhey-angenh!”

<sup>14</sup> Atnwenth iteth 4 weth-rnem, chair arrerent-  
 yarl rtnenherrenh-rnem, rernem angkew, “Ya!  
 Amen!” Alkenh 24 weth-rnem kwenerrew arrpe-  
 marl, atnertel-ayeth ayntemel.

## 6

*Anker-apeny-rneman iylweyel-anem anyentarl-  
 anyentarl*

<sup>1</sup> Yep-yep akely wethel atnyenenh-antey pip  
 ataperr renhan, anker-apeny 7-elarl antwer-  
 rkenh. Atharl altyerr arenh-angkwarr, rap

anyent-tangkwel iylwew. Atnwenth iteth weth-rnem 4 anenh-antey. Anamerl-antey anyentan angkew, kwaty awely-awelyarl angkenhey-alpeyel-apeny, "Apetya!"<sup>2</sup> Athap arew nantew arlter-anem. Ingwerentyarl anerl-alhenh artep-itwel pewenarr-akert. Ingwerentyel renh anthew ampwal mwekart-apeny atyetyart-wenh gold-penh, akapwert-warl arrerneyew. Artwa army-areny rlterrkarlapan, rap ahern-warl-ilwengk anperl-alhew arawerrng rlterrk-akert, ingkerrenh atwemel antengeleyew, Akngey-wetyarl arlkarerreyel-rnem.

<sup>3</sup> Yep-yep akelyel iylwew anker-apeny ingwer-anem pip ikwer-they, namp 2-anem. Atha awew, atnwenth iteth namp 2-anem angkenty, "Apetya!"<sup>4</sup> Athap arew nantew ingwer-anem, rnter-rnter rwapeny. Ingwerentyan angkew ikwer, rarl artep-itwel anerl-alhenhew, "Ahern yanh-warl alha! Ahern-areny-rnem ahel-antha, rernem atwerr-aynteyew ipmew-antey. Nthekwern rernem aney-angenh-anem mwerrant-arey, arrangkw." Renhap ingwerentyel anthew nayp arlpenty-anem.

<sup>5</sup> Yep-yep akelyel iylwew anker-apeny ingwer-anem pip ikwer-they, namp 3-anem. Atha awew, atnwenth iteth namp 3-anem angkenty, "Apetya!" Athap arew nantew irrpwerl-anem. Ingwerentyarl anerl-alhenh artep-itwel, ampwal ntang weigh-emeleyew-arelh-akert.<sup>6</sup> Athap awew, ingwerentyarl angkenty. Nthakenh renh arey-angenh. Ra apek atnwenth iteth 4 weth-rnem-itwew ampepewelew.

Rap angkew, "Aleyan aherrety-anem anem, rl-terrk inggarl ayntemel. Katen-rneman artwerrety anem. Ntang alyepant-anem aynteyel akngerrew, rernem arlkweyew. Kel ntang-then amern-then dear-anem irrem. Arwerl olive-angketyarr-then arwerl grapes-angketyarr-then mwerr-antey menty anayntem." PLEASE CROP THIS ILLUSTRATION ABOVE THE MAN'S WAIST-BAND

<sup>7</sup> Yep-yep akelyel iylwew anker-apeny ingwer-anem pip ikwer-they, namp 4-anem. Atnwenth iteth namp 4-anem angkew, "Apetya!" <sup>8</sup> Athap arew nantew arrkay-anem. Ingwerentyarl anerl-alhenh artep-itwel, itnan *Ipmarl*. Ingwerelan renh apentenh, itnan *Ipmangketyarr-itwel*. Ingwerentyan angkew ikwer-atherrew, "Atha arawerrng-anem mpwelewanth antheyel. Ahern-warl alhenh-atherr apmer arrpanenh-warl, atwerl-alpaynteyew ipmew-antey. Ingwer-rnemant atantherl-alpayntenh-atherr nayp arlpenty-akertel. Ingwer-rneman amern arlkwey-angenhel-ayntenh-atherr, rernemaw ilweyew-ayteng. Ingwer-rneman arntetyel-ayntenh-atherr, rernemaw ilweyew arrpemar. Thwenenh-atherr atnwenth ilek-ilek ahelengkwrnem ingwer-rnemewan, renh-rnem thnweyew ipmew-antey. Ingkerr-weny, ingwer-rneman mentyarl aneyew."

<sup>9</sup> Yep-yep akelyel iylwew anker-apeny ingwer-anem pip ikwer-they, namp 5-anem. Altyerr-itwel atha arew inweng-rnem, itetharl anenh ahern-itwel arrwekel. Rernem angka Akngey-akert ilenh, ilek-ilek rarl mpwarew-

akert. Ingwer-rnemelanap angka ikwer-wety arlkararrew, renh-rnem-anem atwew ipmew-antey. Rernem kweneng-apert anenh apwert ilperr-ilperr yanhel. Apwert ikwer-itwew rernem arrtyenh atnwenth ilek-ilek Akngey-warl-ilwengk. <sup>10</sup> Rernemap arlkenh atayel, “Akngey, Ingkart nga alkenh anewantherr ingkerr-angkwarr! Ngant anyent mwerr; ngant arraty angkey-angker! Ilenger ntwa ingkerrenhan rnkerneyenh ayernemel? Ilenger ntwa atweyenh weth-rnem, anenhantherrenharl atwew-penhan ipmew-antey?” <sup>11</sup> Ingwerentyelan renh-rnem anthew arnkwa arlter-rnem, rernem aylpeyew. Ra angkew, “Alerl mpwelhenh-arey. Atha ingwer-rneman rlwanew, ilweyew irrkaty-angkwarr. Rernemanap arrewantherr apelty. Rernem atyengew warrkerreyel arrpemar.

Ikwer-penhan atha renh-rnem court-emeleyenh, arrenhantherrenharl atwew-penh ipmew-antey.”

<sup>12</sup> Atha arew, yep-yep akelyel iylwew anker-apeny ingwer-anem pip ikwer-they, namp 6-anem. Ahernan artewentyel-anem akngelhew. Ingkenyan arrtyerney-angenh-anem irrew, atemwengk-anem irrew kwenyel-apeny-anem. Alkentan rnter-rnter-anem irrew arn-gapeny. <sup>13</sup> Antyarr-rneman aytnew-anem ahern-warl, amern aytnew-apeny arwerl-they rwarr ilkweng-arey. <sup>14</sup> Alkeran ywerrerl-alhew-anem, pip atapperlem-apeny. Apwert ilkwa ingkerrenhan akngelhenh, ingweram-angkwarr-anem aremerrenh apmer arrpanenh-itwew. Apmer

ahern kwaty alay ampep-itwew ingkerrenhan rernem akngelhenh arrpemar.

<sup>15</sup> Akngerran atererrew-anem, rernemap anterrerenh. Ingkerrenh anterrerenh: artwa alkenh-rnem apmer arrpanenh-areny-rnem, artwa ahelengkw alkenh-rnem, man akngerr-akert-rnem, kapment-areny-rnem, ingwer-rnemewarl warrkerreyel-rnem, amentarl warrkerreyel-rnem-akerr. Rernemap anterrerenh, irrtiyert-aylpeyew apwert-itwew intey-angketyarr-warl. <sup>16</sup> Rernemap arlkenh apwert-rnemew alakenh: "Aytneyew anantherr-warl, irrtiyert-akwerneyew weth-atherr-wety! Yanharl chair mwerr-angker ilkwitwew aneyel-wety irrtiyert-akwerneyew, ra arewerr! Yep-yep akely-wety-then irrtiyert-akwerneyew, rarl anewantherr ahelerreyel, atwewerr ipmew-antey! <sup>17</sup> Arltan rlengk ayntem, Akngeyarl angkew, 'Aylak ingkerrenh court-emeleyen, rwewarl iwemel.' Anantherr nthakenh arrngert rtney-angenh ikwer-atherr-wety."

## 7

*Rernem akngerr Akngey-wenh-rnem-warl rl-wangkwarr ingkwerneyel, 144,000*

<sup>1</sup> Ikwer-penhan atha arew antyerl-rnem 4 altyerr-itwel, rernemap rtenherrenh ahern nhenh-itwew. Ingweran rtenh akngerrakw, ingweran altwerlarl, ingweran ayerrerarl, ingweran antekerrarl. Rernemap arrngert rtenh awer-wety, awer pwewerr ahern-warl, kwaty alay-warl-then arwerl-rnem-warl-then.

<sup>2</sup> Akngeyan angkew, “Awelhenh-arey! Atha arrenhingkerrenh ileyel, alheyew ahern-then kwaty-then apmweleyew.” Antyerl ingwer-anem tyerrelhey-alhew akngerrakw-they, rap rwalep antwerrkenh. Rwalep ra Akngey iteth-wenharl. Antyerlan arlkew-anem antyerl <sup>4</sup> ingwer weth-rnemew, <sup>3</sup> “Alerl-tangkwel arringkerr mpwelhenh-arey! Rlwetangkwel aningkerr warrkenh Akngey-wenh-rnem-warl ingkwerney. Ikwer-penhant arringkerr apmwelem ahern-then kwaty alay-then arwerl-rnem-thenan.” <sup>4</sup> Ingwerentyel atyeng ilew, renh-rnem-warlarl ingkwerneyenh akngerr inngey, 144,000. Rernemanap artwamp Israel-wenh alerikw-rnem 12-penh, awank-akerrarl anenh.

<sup>5</sup> Judah-wenh-rneman 12,000 anenh, renh-rnem-warlarl ingkwernew rlwangkwar,  
 Reuben-wenh-rneman 12,000 anenh,  
 Gad-wenh-rneman 12,000 anenh,  
<sup>6</sup> Asher-wenh-rneman 12,000 anenh,  
 Naphtali-wenh-rneman 12,000 anenh,  
 Manasseh-wenh-rneman 12,000 anenh,  
<sup>7</sup> Simeon-wenh-rneman 12,000 anenh,  
 Levi-wenh-rneman 12,000 anenh,  
 Issachar-wenh-rneman 12,000 anenh,  
<sup>8</sup> Zebulun-wenh-rneman 12,000 anenh,  
 Joseph-wenh-rneman 12,000 anenh,  
 Benjamin-wenh-rneman 12,000 anenh.

Ya, renh-rnem-warl ingkerrenh alakenh ingkwerneyenh.

*Akngerr apmer arrpanenh-areny*

9 Ikwer-penhan athap arew, akngerr rtnenherreri-alhenty. Akngerr inga. Nthekwern count-emeley-angenh, arrangk. Apmer arrpanenh-areny; angka ingwerek-ingwer, irrpwerl-then arlter-then arrkay-then. Rernemap rtnenherrenh arrwekel-ampeny chair ilkwa atyetyart-wenh-itwew, arrwekel-ampeny chair yep-yep akely-itwew-then. Rernem arnkwa arlter-akert, waly-rnem antwerrkemel. 10 Rernemap aylelherrenh artewentyel alakenh-anyem:

“Akngeyay! Ngant anyent aneyel chair ilkwa atyetyart-wenh-itwewan!

Ntwethenant yep-yep akelyel-thenant mpwelak anenhantherrenh itethelem ipmewetyan!”

11 Ampwa alkenh 24 weth-rnem-then atnwenth iteth 4 weth-rnem rernem rtnenherrenh chair arrerenty. Antyerl ingkerrenhan rtnenherrenh ikwer-itwew arrpemar, ampwernem-then atnwenth-rnem-then amperelelhemel. Rernemap kwernerrew-anem chair ilkwa atyetyart-wenh arrwekel-ampenyel, atnertel-ayeth ayntemel, nakemel Akngey alakenh:

12 “Ya, Akngey anewantherrenh mwerr-angker! Ingkerrel anantherr renh nakemer!

Ra ingkerrenh iterl-areyel! Ra arawerrng rlterrk-akert!

Ra ilek-ilek mwerr-angker mpwarew anewantherr ingkerrew!



Ingkerrenhel renh mwerr antwerl-anemer  
intem-antey aleth! Ya, arraty alakenh-  
anyem!”

<sup>13</sup> Ampwa alkenh anyentel ayenh ayernew,  
“Arlter-akert yanh-rneman, ntwan apek renh-  
rnem iterl-areyel? Nthenh-areny-rnem rerne-  
man?”

<sup>14</sup> Atha tyernew, “Atha iterl-arey-angenh. Nt-  
want iterl-areyel.”

Ra angkew, “Ingwer-rnemelan rlterrk  
mpwarenh ikwer-rnem, atwemel renh-rnem,  
artewentyel pwarrk anthemel. Alakenhaymarl  
ayntenh-angkwarr, rerneman Akngey-wety  
angkeperrey-angenh-antey. Rernem iterl-  
arenh-antey, yep-yep akely Akngey-wenh  
katy ilwewarl ikwer-rnem, arrnga thelemel.  
Rernem apmwangkwarr-tangkwel anenh,  
rernemap awelhew-anem yep-yep akely ikwer.  
Arrnga ikwerrenhel ra apmwa ingkerrenh  
irrarlkew ikwer-rnem-wety. Arnkwerneman  
mwerr-angker arlter-rnem ikwer-rnem-wenh,  
renh-rnemarl irrarlkew arrnga ikwerrenhel.

<sup>15</sup> Alakenhaym-wety:

Rernem rtnenherreyel arrwekel-ampeny chair  
ilkwa Akngey-wenh-itwel,  
warrkerremel ikwer arltel-then kwenyel-  
then tyaty ilkwa ikwerrenh-itwew.

Ya, Akngeyan aneyel chair ilkwa ikwer-itwel,  
arntarnt-aremel ikwerrenh-rnem, iwerl-  
alhey-angenh. <sup>16-17</sup> Akngey-wenh yep-yep  
akely ra rtneyel chair ilkwa arrerenty.

Artwa yep-yepew-artey-apenyarlap ran.

Ra renh-rnem arntarnt-areyel,

ayteng-akngemel kwaty mwerr-angkerarl  
 antereyellarl-angketyarr-angkwarr.  
 Kwaty renharl antywem-penh, itetharlap aleth-  
 antey aneman.  
 Angayakw irrey-angenh, angkethakw irrey-  
 angenh-anem, arrangkw-anem.  
 Itwernel ampey-angenh-anem, ampepenyel  
 rwenperrey-angenh.  
 Akngeyel rantey-anem irrarlkeyenh anngerne-  
 man.  
 Rernem arrangkey-angenh anaynteyew  
 intem-antey.”

## 8

### *Anker-apeny namp 7-anem iylweyel*

<sup>1</sup> Yep-yep akely ra antwerrkenh-antey pip at-  
 aperr renh. Rap iylwew anker-apeny anyent  
 ingwer-anem pip ikwer-they, namp 7-anem.  
 Akngerr akeleyterrew-anem irrwerl. Alerl  
 rernem angkey-angenh akeleyt anew.

<sup>2</sup> Atha arew antyerl 7 ingwer-rnem-anem.  
 Nhenh-rneman intem rtnenh Akngey-itwel  
 arrwekel-ampeny. Ingwerentyel terampet  
 anthew ikwer-rnem anyentam-anyent.

<sup>3-4</sup> Apwert ilperr-ilperr gold-elarl artew  
 ayntenh arrwekel-ampeny chair mwerr-  
 angker atyetyart-wenh-itwew. Rernem rwa  
 aperrk-tangkwel arrernew apwert ikwer-  
 warl, rernemap irrkwa gold-penh thalt-apeny  
 mwerr-angker intey-angkerinp aperrk-warl-  
 anem arrernew, rap mwerr-angker intenh

kwert-angkwarr. Antyerl ingweran aremerrey-alhew-anem, apwert ikwer-itwew arrwekelampeny rtnerl-alhemel. Rap irrkwa gold-penh antwerrkenh. Ingwerentyel anthew thalt-apeny akngerr mwerr-angker inteyelarl, irrkwewarl-anem arrerneyew, aperrk-itwew arrtyemel. Antyerlel irrkwa antwerrkew. Irrkwa ikwerthey-anem kwert itntenh Akngey-warl-athek.

Kwert mwerr-angker-anem itntew Akngey-warl-athek, raw inkwerelheyew. Akngey-wenhrnemarl angkem ikwer-warl, irrkaty-angkwarr angka alpem ikwer-warl ikwer-rnem-they. Alakenh-anyem kwert-apeny angka ikwer-rnemwenh alpem Akngey-warl.

<sup>5</sup> Antyerl rap inew aperrk rwenp-rnem apwert ilperr-ilperr ikwer-they, arrernemel irrkwa ikwer-warl. Irrkwa renh aperrk-akert iwew kwenel-athek ahern-warl. Arwapeny arwerlk angkew, awely-awely-anem arrkew, ahern arrewemel.

#### *Antyerl-rnemel 4 terampet-rnem angelh-angelheleyel*

<sup>6</sup> Antyerl <sup>7</sup> rernem mpwelhenh, angelh-angelheleyew terampet. <sup>7</sup> Antyerl arrwekelenyel-tangkwel angelh-angelhelew terampet ikwerenh. Anamerl-antey ingwerentyel iyntwerelhelew aperrkwer, rwa, arrngethen, iwemel ahern-warl. Rwelan ampernew apmer ingwerentyant arwerl ingwerentyant-then. Rap antywer atherrkeny ampernew ingkerr.

<sup>8</sup> Antyerl ingwerel-anem terampet ikwerenh angelh-angelhelew. Ingwerentyel anamerl-antey iwew apwert-apeny rwakert ilkwa kwaty alay-warl. Kwaty alay ingwer-ampeny anrrnganem irrew. <sup>9</sup> Kwaty alay-areny ingwer-rnemant ilwernerrew. Rtnwernem akngerr alhenh kwaty alay ikwer-itwew. Apwert ilkwel ra ngkweltyelew rtnwa ingwer-rneman. <sup>10-11</sup> Antyerl ingwerel-anem terampet ikwerenh angelh-angelhelew. Anamerl-antey antyarr ilkwa aytnew alker irrwerl-they, itnan *Tyekerteley-angker*. Rwenp innga ra ampenh, rap atwew ilpay ingwer-rnem kwaty apeynt-then. Kwaty ingwer-ampeny tyekerterrew. Akngerran ilwernerrew kwaty ikwer-penh.

<sup>12</sup> Antyerl ingwerel-anemarl terampet ikwerenh angelh-angelhelew. Anamerl-antey atwemengkel artew ingkenyan anyent-ampeny. Alkent anyent-ampeny artew arrpemarl irrkaty-angkwarr. Ingkenyan atemwengk irreyelpew arlta ampepew-atety. Alkentan atemwengk irreyelpew ampepenyew-atety. Antyarr ingwer-rnemelan arrtyerney-angenh irrew.

<sup>13</sup> Athap irrwerl itnywenew, irretyarl alkerelerrenh. Rap arlkenh alakenh artewentyel: "Pwertay! Pwertay! Pwertay! Ayengan amperrngerreyel arrewantherr ahern-areny-rnemay! Antyerl ingwer irrpety yanh-rnem-alew? Rernem-anemarl terampet-rnem angelh-angelheleyen. Irrpety-inger ilek-ilek apmwa aynteyenh ahern-itwew!"

## 9

*Antyerl nampa 5-el terampet angelh-angelheleyel*

<sup>1</sup> Antyerl ingwerel-anem terampet ikwerenh angelh-angelhelew. Antyarr atha arew, alkerthey aytenty ahern-warl. Rap artwapeny rtnew irrka intwer-ampenyel. [Irrka ikweritwewan Akngeyel inweng apmwernem aken-tem. Ingwer-ingweran ra renh-rnem iweyenh rwa ilkwewarl, aletharl ampeyel-warl.] Ampwal ilperr-ilperrel arriwan artew door-el-apeny. Ingwerentyel key anthew antyarr renh, door altywereleyew.

<sup>2</sup> Rarl altywerelelew, kwert ilkwa arlwar anew irrka ikwerthey, rwa ilkwethey-apeny. Kwertel ingkeny artew-anem. Alker atemwengk irreyelpew, nthakenh arey-angenh-anem.

<sup>3</sup> Intelty akngerr tyerrelhew kwert ikwerthey, ahern-warl-anem atwarrerrew. Ingwerentyel renh-rnem rlterrkelew, akngerr atantheyew, atneth-akertel-apeny. <sup>4</sup> Antyerl angkew ikwer-rnem, "Atherrk arlkwey-angenh, arwerl arlkwey-angenh, alperr-akerr arlkwey-angenh! Menty aney! Menty aney Akngey-wenh-rneman, rlwewarlarl ingkwernew-rneman! Ingwer-rnemant atanthenh-arey! <sup>5</sup> Nthakenh arrantherr renh-rnem atanthey-angenh ipmew, arrangkw. Arwa pwarrk anthem alkent-rnem 5-ew-atety." Apmwanem rernem awelhem, atneth-akertel atanthey-penh.

<sup>6</sup> Ikwereng-arey rernem iterrem alakenh, "Pwarrkerreyel anantherr! Ilweyew-anem

ananterr!" Arrangkaw! Ilwey-angenh-antey. Rernem anerl-aneyenh, kwarnelherl-aneyenhant pwarrk inngey.

<sup>7</sup> Intelty-rneman rtenherrenh nantew-rnem-apeny. Rernem mpwelhenh, alheyew akgerrarl atwerrenh-warl. Ampwal mwekart-apeny atyetyart-wenh gold-penh-akert akapwert-itwew. Inngerran artwapeny. <sup>8</sup> Alta arlpenty arelh-apeny. Arntekan arreylp lion-apeny. <sup>9</sup> Arneltyan arlkwertel ayen-penhel artelhew irrtiyart-wety. Intelty-rnemarl alkerelerrew, aympelh-rnem arwerlk angkew, nantew pakey-akert akgerr-apeny, atwerrenty-warlarl anterrenty, akgerrarl atwerreyel-warl anterrenty. <sup>10</sup> Rernemap atanthenh kantyel, atneth-akertel-apeny. Alakenh rernem akgerr pwarrk anthew alkent 5-ew-atety. <sup>11</sup> Antyerl anyent atyetyart ikwer-rnem intelty-rnemew anenh, rap irrka intwer kwert-akertew-artey anenh. Angka Hebrew-they renh itnewem *Abaddon*, angka Greek-theyan itnewem *Apollyon*-arl. Itna yanh-atherrel ileyel, *Altheyey-angker Ingkerr*.

<sup>12</sup> Alakenh apmwa arrwekelenyan ayntem. Alerl-antey apmwa ingwer-atherr aynteyenh.

*Antyerl namp 6-el terampet angelh-angelheleyel*

<sup>13</sup> Antyerl ingwerel-anem terampet ikwerenh angelh-angelhelew. Anamerl-antey ingwerenty atha awew angkenharl. Ran apwert ilperr-ilperr ikwer-they angkenh, Akngey-itwelarl arwekel ayntenh. Apwert renhan gold-el artew,

rap rewely 4 atnyenew. Rewely ikwer-rnem-they apek ra angkenh. <sup>14</sup> Rap angkew antyerl terampet-akert ikwer, "Iipay yanh-itwew Euphrates-itwew antyerl 4 aneyel, arertnewarl. Renh-rnem tyarlewanem!" <sup>15</sup> Antyerl 4 rernem mpwelhenh arlta ikwerew, Akngeyelantarl iterl-areyew. Ra renh-rnem artwerelenh-tangkwel, rap renh-rnem alakenh ilenh, "Arnwarnelhenh-arey!" Arlta ikwerel, renh-rnemarl tyarlewewel, rernemap alhew, akngerr atweyew ipmew.

<sup>16-17</sup> Athap altyerr-angkwarr-anem arew, artwa army-areny-rnem nantew-akert alhenh, akngerr innga. Nampan atha awew; 200,000,000-arlap ran. Artwa army-areny-rnemel atnyenew alkwert-rnem ayen-penh, arnelty artelheyew. Alkwert rernem rnter-rnter, blue one, yellow one. Nantew-rneman akapwert lion-apenyarl. Lherrm arrakert-they rlwemertnew, ikwakeng itntenh kwert yellow one. <sup>18-19</sup> Kanty rtnwem ahelengkw-rnem-apeny, tnhwaynteyew akngerr ipmew. Rtwem-rnemel rernem ingwer-rnem tnhwew ipmew. Nantew-rneman alhew apmer arrpanenh-warl, atweyew akngerr ipmew lherrmel kwertel-then.

<sup>20</sup> Ingwer-rnemanap ilwey-angenharl, arrangkw-antey. Rernemap Akngey-warl angkeperrey-angenh, weth-rnem iteth-anteyarl anew-rneman, arrangkw. Rernem angkenh-antey inweng apmwernemew. Ya, rernemap kwenerrenh-antey ampwal apmwernemew, rernemarl mpwarewew gold-penhew, thilp-penhew, bronze-penhew, apwert-penhew, arwerl-penhew. Ampwal apmwernemel

nthakenh arey-angenh, nthakenh away-angenh, nthakenh alhey-angenh, arrangkw. <sup>21</sup> Rerneman apmwel-ayeth-antey anenh; ipmew ingwer-rnem atwenh, ingwer-rnem aylenh arntetyerreyew, mpwenyel alherlewenh, irrtiyert-inenh ilek-ilek. Rernemap nyerrerrey-angenh, amperrngerremel angkey-angenh ingwer-rnemew, angkepperrey-angenh Akngey-warl-athek, arrangkw.

## 10

### *Antyerl ingwerelan pip ataperr antwerrkeyel*

<sup>1</sup> Atha arew antyerl alkenh ingwer-anem altyerr-angkwarr, irrwerl-theyarl atwarrenhey-alhew. Kwenpayel renh artew, arnkwel-apeny. Mpwelarrel akapwert-angkwarr amperelew. Ingerrarl itwern-apeny amparrkenh. Arlaw atherran rwa lherrm-apeny. <sup>2</sup> Rap pip ataperr antwerrkenh. Ingwerentyel arrwekel-antey pip renh arlpimpelew. Rarl rtney-alhew ahern-itwew, ingkety arraty-ampeny alay-itwewarl, ayleng-ampeny ahern artwerrety-itwew. <sup>3</sup> Rap atayel arlkenty iwew lion-apeny. Rarl arlkenty iwewel atha awew awely-awely angkenty-apeny. 7-inger ra angkew alakenh-anyem. <sup>4</sup> Awely-awely angkenty-penh, ayeng arrkernelhew, pip ineyew, angka ikwerenh ingkwerneyew ikwer-warl. Ingwerentyarlap angkewan irrwerl-they, "Menty ayntey! Angka ingkwerney-angenh, awely-awelyarl angkew 7-inger. Ingwerenty iley-angenh!"



5 Antyerl atyetyart rarl rtneuh alay-itwew ahern-itwew-then, rap irrwerlerrew itep arraty-angkwarr alker-warl-athek. 6 Rap angkew, "Awelhenh-arey ingkerrenh-antey! Akngey ran intem-antey aleth aneyel! Rap mpwarew alker, ahern, alay-then ilek-ilek. Innga atha ileyel, rarl aweyel-wety. Nthakenh ra arlengew-alenty mpwelhey-angenh, arrangkw! 7 Awank-akerr ra iterrew, "Nthakenh atha ilem ahern nhenhan, atharl mpwarewan?" Ranap akngerr iley-angenharl, rarl iterrenhan. Artwa angkakert-rnemant ilenhan ra. Aleyanap arrantherr ingkerrenhel iterl-areyenh, antyerl namp 7-elarl terampet ikwerenh angelh-angelheleyenhel."

8 Irrkaty wethan angkew atyeng arrpemarl irrwerl-they, "Alha antyerl atyetyart ikwer-warl, alayelarl rtneyel-warl ahernel-then. Pip weth ineyew, rarl antwerrkeyel, pip arlpimp renh."

9 Ayengap alhew antyerl ikwer-warl, pip ikwer ayerneyew. Rap angkew atyeng, "Nhanteyaw! Pip nhenh ina! Arlkwanem renh! Arrakert-itwew antemarn-apeny arwerl ankerr-penh-antey. Atnert akey-angkerarlap ran." 10 Athap pip renh inemel arlkwew-anem, rarl ilanthew-angkwarr. Ya, inngarl antemarn-apeny arrk-ernew. Atharl arlkwew-penh, atnert ayenh akew. 11 Ingwerenty atyeng angkew, "Alha arrpemarl, angka Akngey-akert ileyew ingkerrenhew, rernemaw iterl-areyew, nthakenharl irreyenh ikwer-rnemew. Atyetyart ilkwernemew-then ila. Akngerr apmer arrpanenh-itwew ila; angka ingwerek-ingwer, irrpwerl-then, arlter-then, arrkay-then."

# 11

## *Angkakert atherr Akngey-wenh*

<sup>1</sup> Ingwerentyel ayenh anthew arwerl arlpenty arraty ruler-apeny measure-emeleyew-arelh. Rap angkew, "Arwerl nhenh ina. Alha, aylpenha Akngey-wenh tyaty ilkwewarl. Arwerl measure-emeleyew-arelh akngerr-inger arrerna tyaty ikwer-angkwarr, ntwaw iterl-areyew, warl ilek-apenyarlap ran. Arlpenty apek, rtwety apek. Measure-emela irrkaty-angkwarr apwert yanh amperneyew-arelh. Ingwer-rneman rtnenherreyel warl ikwer-itwew, nakemel Akngey-warl aylelherreyel. Arey renh-rnem count-emelemel. Akngerr apek, irrpetyap apek. <sup>2</sup> Yard yanhan aketh-ampenyen mentyarl, measure-emeley-angenh. Akngeyelan yard yanh anthew ingwer-rnemew, renh iterl-arey-angenh-rnemew. Ra anthew tawen Jerusalem-then ikwer-rnem, rernem atakeyew. Rernemap lthwemel alhaynterl-aneyenh apmer ikwer-itwew alkent 42-ew-atety. <sup>3</sup> Rernemarl apmer ikwerel aremerrey-alhenty, atha angkakert atherr ikwer-rnemew thweneyenh, angka arraty atyenh ilaynteyew. Ratherrap ilerl-aneyenh alkent 42-ew-atety, arnkwa apmwel aylpemel amperrngerremel." Alakenh-anyem ra angkew atyeng. <sup>4</sup> Angkakert Akngey-wenh weth-atherr ratherr intem-antey rtnem Akngey-itwew. Ran atyetyart aneyel ahern ingkerrenh-angkwarr. Ratherran arwerl olive atherr-apeny, ampwal arlpenty weth atherr lherrm-angketyarr-apeny. <sup>5</sup> Ingwer-rneman

ikkelhey-angenh ikwer-atherr artewenty. Ingwerenty apek iterrem, renh-atherr atweyew-arrpantey, kel rwa lherrm arrakert ikwer-atherr-they tyerrelhem, ywerrelhelemel atwem. Ingwerentyel renh-atherr irrwernem, ratherrap renh-rnem ilwerl-athenemarl. <sup>6</sup> Akngeyelan renh-atherr rlterrkelew, kwaty-then rntwey-angeneheyew. Ratherrarl angka Akngey-wenh ilerl-apaynteyenheng-arey, kwatyanap rntwey-angenh, arrangkw arrpemarl. Akngeyel renh-atherr rlterrkelew arrpemarl, kwaty apmweleyew, kwatyan arrnganem irreyew. Ratherr ilkelhentyelan, apmwa ilek-ilek thweneyenh ahern-warl. <sup>7</sup> Alkent 42-ew-atety ratherr alherl-aneyenh, ilerl-apaynteyew angka Akngey-wenh.

Ikwer-penhan arraylenty anyent tyerrelhey-aynteyenh irrka irrkaty intwer ikwer-they, renh-atherr antwerrkeyew. Rap renh-atherr atweyenh ipmew-antey. <sup>8</sup> Rap ipma atherr iwerlelpeyenh iwerr ampep-itwew tawen ilkwa Jerusalem-itwew. Apmer ikwer-itwewan Jesus atwemel, arwerl iylpeyl-atherr-warl tywenew. Akngerrel apmer renh itnewem *Sodom*, *Egypt*-then. [Rernem iterl-areyel, artwa apmwernem anenh apmer ikwer-atherr-itwew awank-akerr.] <sup>9</sup> Ya, ipma ratherr ayntaynteyenh arlta irrpetyew-atety ingwepenh-ingwerel-anem. Akgerr-anem apetyeyenh apmer arrpanenh-they, angka ingwerek-ingwer angkemel - irrpwerl-then, arlter-then, arrkay-then. Rernemap ipma renh-atherrenh atwew-areyenh, ingwer-rnem-then artwereleyenh,

akwernewerr. <sup>10</sup> Rernemarl renh-atherr arerl-aneyenhel, rernemap inkwerelhemel angkerrerl-aneyenh alakenh, “Mwerr wenh! Weth-atherr ipmanem! Ratherran pwarrk anthenh anewantherr, aleyan arrangw-anemar!” Rernemap akarr-akarrerreyenh, amern kwenty arlkweyew, ilek-ilek-then antherremel inkwerelhemel. <sup>11</sup> Rernem alakenh irreyenh arlta irrptyew-atety ingwepenh-ingwerel-anem, ratherrarl ipmantey aynterl-anerl-aneyenh.

Ikwer-penh Akngeyel ikwer-atherr rwarr anthew, ratherrap itetherrenhey-alpew-anem anamerl-antey, rtnenhey-alpew-anem. Akngerrel arew, rernemap apateyelpew atererremel. <sup>12</sup> Ratherr awew, ingwerenty atayel angkew ikwer-atherr irrwerl-they, “Apetyenh-atherr nhenh-war!” Renh-atherr arlkarerreyel-rnemelan intwarew, ratherrarl irrwerl alpew kwenpay-angkwarr.

<sup>13</sup> Ahernan artewenty innga arrewew-anem, iltep-iltewelhew ingweram-angkwarr. Warl ingwerentyaman aytnew ngkweltyerremel. Akngerr ilwernerrew, 7,000 innga. Ingwerenty iteth-anteyarl anew, atererrew innga, rernemap Akngey nakew.

<sup>14</sup> Alakenh-anyem apmwa ingwer-anem aynteyenh. Alerl-antey apmwa anyent ingweran aynteyenh.

*Antyerl ingwerel-anem terampet namp 7  
angelh-angelheleyel*

15 Antyerl ingwerel-anem terampet ikwerenh angelh-angelhelew. Ingwer-rneman atayel angkerrenh irrwerl alakenh:

“Akngeyel Jesus Christ rlwanew.

Rlengkan ratherr atyetyart ilkwanem anem ahern ingkerrew.

Akngey ran atyetyart aneyenh arawerrng rlterrk-akert intem-antey!”

16 Ampwa alkenh weth-rnem 24 rernem anenh-antey Akngey-itwew arrwekel-ampenyel chair ikwerenh-rnem-wenh-itwew. Rernemap kwernerrew-anem, atnertel-ayeth ayntemel, nakemel Akngey alakenh:

17 “Akngeyay, *Atyetyart Ilkwa Ingkerrenhew!*  
Anantherr ngenh nakem!

Nga arrwekeleny anenh, iteth-antey aneyel.

Aleyan nga atyetyart ilkwa aneyel arawerrng rlterrk-akert apmer arrpanenhew!

18 Ingwer-rnem ngkweng awelhey-angenh-rnem rernem ahelerrenh ngkweng.

Ngan ikwer-rnem ahelerrem-anem aley.

Rlengkan arlta ntwā rlwanewarl, ipmernem itetheleyew,

renh-rnem ayerneyew-anem anyentel-anyentel.

Rlengkan ntwā ilek-ilek mwerr-angker anthem angkakert ngkwenh-rnemew, angka ngkwenharl ilenh awank-akerr.

Rlengkan ntwa ilek-ilek mwerr-angker an-  
them ngkwenh-rnemew, akely-akelyew  
ilkwetyilkwew,  
rernemarl ngkweng mwanty-antey awelhenh.  
Aleyan nga awakelhem ingwer-rnemew,  
ngkwenh-rnemarl atwenhew ahern  
nhenh-itwew.  
Ntwap inngarl renh-rnem irrarkemel  
atweyenh.”

Alakenh-anyem ampwa alkenh weth-rnem 24  
angkwew.

<sup>19</sup> Ikwer-penhan ingwerentyel arriwan alty-  
werelew Akngey-wenh tyaty ilkwitwew irrw-  
erl. Arriw-angkwarr athap arew box impen  
Akngey-wenh. [Apwert ilperr-ilperr atherr  
angka Akngey-wenh angka rlterrk-rnem-akert  
10 ayntenharl box ikwer-itwew.] Atharl arew  
box impen, awely-awelyan arrkemel angkwew,  
ahernan arrewew, aperrkwer aytnew irrwerl-  
they.

## 12

*Rtnwem ywarn arrkernelheyel,  
arelh anyent antwerrkeyew*

<sup>1</sup> Ikwer-penhan ilengem ingwer-lkwer aremer-  
rew tyak innga alker-itwew. Arelhanap ra, arelh  
anyent-anem alkerel anerl-anenty. Arnkwan  
ikwerenh itwern-apeny. Ra rtnew alker-  
itwew. Akapwert-itwew ampwal mwekart-apeny  
mwerr-angker atyetyart-wenh antyarr 12-akert.  
<sup>2</sup> Arelh irrepern ra arntetyarl awelhewarl art-  
nenh. <sup>3</sup> Athap arew, ilengem ingwer-lkwer

aremerrew tyak innganem alker-itwew. Rtnwem ahelengkw-apeny rnter-rnter, ilkwa inngarlap ran, akapwert-rnem ampwal mwerr-angker 7 mwekart akely-apeny atyetyart-wenh-rnem-akert, rewely-rnem 10 arrpemar. <sup>4</sup> Rap kanty-anem akngelhenh ingweram-angkwarr, antyarr-nem iwemel kantyel alker-they ahern-warl. Rap rtney-alhew arrwekel-ampeny arelh-itwew, ampa akely rakemel arlkweyew. <sup>5</sup> Arelhel away akely-anem atnyenew. Rtwemelanap nthakenh away renh rakey-angenh. Ingwerentyelan renh inew anamerl-antey, akngeynemel Akngey-warl-athek chair ilkwa ikwerenh-warl-then. Renhanap Akngeyelarl rlwanew, aneyew atyetyart ilkwa ahern ingkerrew. Rarl ilkwerreyenhel, rap ingkerr arntarnt-areyenh arawerrng rlterrk-akertel. <sup>6</sup> Arelh ran irrtiyert-anterrew ahern arlpaw-ampeny-warl. Apmer ikwer-itwew Akngeyel alalewew ikwer arrwekel-antey, ra aynteyew. Akngey ikwer mpwelhenh, renh arntarnt-areyew. Ra arntarnt-arenh alkent 42-ew-atety.

<sup>7</sup> Ikwer-penhan irrwerl-areny-rnem atwerrenh-anem. Antyerl alkenh itnan Michael ra yerl-alhew antyerl ikwerenh-rnem-akert, rtnwem ilkwa renh atweyew antyerl apmwernem-then. <sup>8</sup> Michael ikwerenh-rnemelan rtnwem ilkwa antengelemel atwew ikwerenh-rnem-then artewenty, renh-rnem irrwerl-they irrentemel arleng intem-antey. <sup>9</sup> Ya, rernem rtnwem renh iwew kwenel-athek ahern-warl. Ran arrwekeleny weth, arrenty alkenh. Itna ingweran *Satan*. Ran irrtiywalth, irrtiywerl-

amperney-angker ingkerr ahern-itwew, rernem  
apmwel-ayeth anaynteyew. Michael antyerl  
ikwerenh-rnem-akertel renh iwew kwenel-  
athek, antyerl apmwernem-then.

<sup>10</sup> Atha awew ingwerenty arlkew atayel  
irrwerl-they alakenh:

“Akngeyan Atyetyart Ilkwa Ingkerrew!

Arawerrng rlterrk-akertel ra anenhanther-  
renh itethelem ipmewety.

Rap arrernew Alerikw Jesus Christ atyetyart  
arrpemar.

Arrenty alkenh Satan rtnenh Akngey-itwel  
arrwekel-ampeny intem, ingwel itwernew,  
ayntarrp-ilemel Akngey-wenh-rnem irrtwyer-  
remel.

Michael antyerl ikwerenh-rnem-akertelan  
renh irrentew intem-antey arawerrng  
rltterrakertel.

<sup>11</sup> Akngey-wenh-rnem rernem arrenty Satan an-  
tengelew,

Jesus Christ Akngey-wenh yep-yep akely ra  
katy ilwew ikwer-rnem,  
arrnga thelemel arwerl iylpeyl-atherr-itwew.

Alakenh-anyem rernem arrenty Satan anten-  
gelew.

Ingwer-rneman ilkelhenh, renh-rnem  
atweyew ipmew-antey.

Akngey-wenh-rnemelan angka innga ikwerenh  
ilayntenh,

ingwer-rnem-wety atererrey-angenh,  
arrangk.



Alakenh arrpemarl rernem arrenty Satan renh antengelew.

<sup>12</sup> Alakenh-wety ayengan angkeyel arrewantherr irrwerl-areny, 'Inkwerelhemel anaynteyew!' Arrantherran ahern-areny-rnem alay-areny-rnem, arrewantherr rlterrkarl aynteyenh. Arrentyan atwarrew, aney-alpeyew arrewantherr-itwel! Aleyan ra ahelerreyel artewenty innga, rarl iterl-areyel, arlta ra arrer-anem irreyel, Akngeyelarl ikwer arrngerteweyenh intem-antey."

<sup>13</sup> Rtnwemelarl iterl-arew, Michael-elarl renh iwew ahern-warl, rap iterrew, "Ya, atha arelh weth alwerney-anem away akely-akert." <sup>14</sup> Ingwerentyelanap arelh renh anthew aympelh atherr irreyt ilkwepenh, raw arlkerelerreyew-awaty apmer ikwerenh-warl arlpaw-warl, Akngeyelarl ikwer alalewew arrwekel-antey. Apmer ikwer-itwew rtnwemel nthakenh renh antwerrkey-angenh, arrangkw. Akngeyelap arelh renh arntarnt-arenh alkent 42-ew-atety. <sup>15</sup> Rtnweman ikwer arrkernelhenh arrngerteweyew, mwerr-antey alkerelerrewerr. Ra rllkwetherrew kwaty akngerr arrakert-they atnyerr-apeny, arelh renh akngeyew kwatyel. <sup>16</sup> Ahernanap altywererrew, renh alpemeleyew. Kwaty rtnwemelarl rllkwetherrew, ra altywer ikwer-angkwarr thelhelew, arelh ra mwerr-antey alkerelerrew-anem. <sup>17</sup> Rtnweman

ahelerrew arelh ikwer artewenty innga, rap alhew, ampa ikwerenh-rnem atweyew, ampa aperlikw-rnem-then. Rerneman Akngey-wenh angkewarl awelheyel-rnem, intem-antey angka Jesus-akert ileyel-rnem ingwer-rnemew.

<sup>18</sup> Rtnwem ran rtnenh arlwerengel kwaty alay impalth-itwew.

## 13

### *Arraylenty anyent aremerreyel kwaty alay-they*

<sup>1</sup> Ikwer-penhan atha arraylenty arew, kwaty alay-theyarl tyerrelhey-ayntew. Ranap ingwer-lkwer-anem, rewely 10-akert akapwert 7-akert. Rewely 10 ikwer-rnem-itwew ampwal mwerr-angker mwekart atyetyart-wenh akely-apeny gold-penh 10 ayntew. Akapwert 7-itwew ingwer-entyel ingkwernew angka apmwernem, Akngey arrkentalhelemel. <sup>2</sup> Arlka atnwenth lipert-apeny, ingkelthel arlpenty arreylp-akert bear-apeny. Ar-rakertan lion-apenyarl. Rtnweman angkew, "Atha ngenh rlwanem, atyeng warrkerreyew. Atha arawerrng atyenh ngenh anthem, ngenh rlterrkeleyew, ntwaw ilek-ilek mpwareyew. Ngap anem chair ilkwa atyenhel, ngap atyetyart anem ahern-itwew."

<sup>3</sup> Athap arraylenty renh arenh, akapwert 7-akert. Akapwert anyentan kwerrm-akert, ayengap iterrew, "Ingwerentyelan renh ipmew atwew arrwekel-antey! Rap itetherrenhey-alpew!" Ingkerrel ahern-itwew arew, rernem apaterrew, awelhemel ikwerant-anem,

rarl angkenhew. <sup>4</sup> Rernemap ingkerrenh kwenerrenh apal rtnwem ikwer, Akngey inngewarl-arrpantey, rtnwemel rarl arawerrng ikwerenh anthew arraylenty ikwer. Rernem ingkerr kwenerrenh arraylenty ikwer-warl, nakemel alakenh, "Arraylenty ran rlterrk inngey ingwer-rnem-angkwarrarl! Nthakenh renh ingwerentyel ipmew atwey-angenh!"

<sup>5</sup> Akngeyelan arraylenty tyarlewew, ra nakel-hemel angkeyew, Akngey renh-then arrkental-heleyew. Rap renh tyarlewew, ra aneyew atyetyart alkent 42-ew-atety. <sup>6</sup> Arraylenty rap Akngey arrkentalhelew artewenty innga itna ikwerenh-then. Rap Akngey-rnem arrkentalhelew, ikwerel-arleng aneyel-rnem-then. Rap apmer Akngey-wenh arrkentalhelew, rernemarl ingkerr anew-anenh irrwerl.

<sup>7</sup> Ikwer-theyan arraylenty alhew, atwerreyew akngerr Akngey-wenh-rnem-then alkent 42-ew-atety, renh-rnem antengeleyew-atety. Nthakenh ingwerentyel artwereley-angenh. Akngeyel ran artwereley-angenh arrpemar. Arraylenty ra atyetyart ingkerrenhew anenh; apmer arrpanenh-arenyew, angka arrpanenhew, irrppwerlew, arlterew, arrkayew-then. <sup>8</sup> Ingkerr ahern-areny-rnem ikwer kwenerremel nakeyenh. Ingwerentyanap irrpetyap ikwer awelhey-angenh aneyenh, renh nakey-angenh. Itnan ikwer-rnem-wenh Akngey-wenh yep-yep akelyel ingkwernew arrwekel-antey pwek impen ikwerenh-warl, rernemaw intem-antey aneyew. Ra itnernem ingkwernew awank-akerr, rarl alker-then ahern-then mpwarey-angenhel-antey.

Artwa ahelengkw-rnemel yep-yep akely atwew ipmew.

<sup>9</sup> IyIpakert arrantherr! Awelhenh-arey mwanty!

<sup>10</sup> Akngeyel rlwanew akngerr ikwerenh-rnem, renh-rnem akwerneyew tyayl-warl.  
Inngarl ingwer-rnemel renh-rnem antwerrkem, akwernemel tyayl-warl.

Akngeyel rlwanew akngerr ikwerenh-rnem, renh-rnem atweyew ipmew nayp arlpentyel.

Inngarl ingwer-rnemel renh-rnem akep-akalthem ipmew.

Alakenh-wety Akngey-wenh-rnem ikwer awelh-aynteyew, ipmelhey-angenh.

*Arraylenty ingwer-anemarl  
tyerrelheyel ahern-they*

<sup>11</sup> Ikwer-they atha arraylenty ingwer-anem arew, ahern-theyarl tyerrelhew. Ingwer-ikwerarlap ran, rewely atherr-akert, yep-yep akely apeny. Rap atayel arlkenh rtnwem weth-apeny. <sup>12</sup> Ra warrkerrenh arawerrng ilkwakert arraylenty wethew alay-arenyew. Arawerrng ilkwakertel ra ahern-itwew pwerep-anthenh, kwenerr-aynteyew arraylenty alay-arenyew, renh nakemel. Arraylenty alay-areny ranap kwerrm ilkwakert weth akapwert-itwew. <sup>13</sup> Rewely atherr-akert wethel tyakel

ilek-ilek mpwarenh, akngerrrel araynteyew, rernemaw apateyew. Ra ilew, rwa apetyeyew alker-they ahern-warl. Inngarlap alakenh irrewan. <sup>14</sup> Akngeyel renh tyarlewew, alakenh irreyew, arraylenty alay-arenyew warrkerreyew. Alakenhap ra ahern-areny akngerr irrtywerl-ampernew, rernemaw iterreyew, alay-arenyan atyetyart ilkwew-arrpantey. Rap renh-rnem ilew, “Arwerl ilkwa arrpeyew-arrpantey, arraylenty weth alay-areny-apeny, kwerrm napp arlpenty-penh-akert!” Rernemap arwerl mpwarew rapeny. <sup>15</sup> Akngeyel ran tyarlewew rewely atherr-akert weth, arwerl renh itetheleyew, ra angkeyew-anem. Rap renh-rnem ilew, “Arwerl ikwer-warl kwenerrenh-arey nakemel!” Ingwerentyanap apek kwenerrey-angenh arwerl ikwer. Kel arwerl ra ingwer-rnem ilanthenh, renh-rnem atweyew ipmew. <sup>16</sup> Rewely atherr-akertel warrkenh ikwerenh-rnem ilenh, ingkerrenh-antey amperneyew pwelek-apeny itep arrayty-angkwarr, rlwewarl apek. Renh-rneman alakenh ampernem; ilkwernem, akely-rnem, man akngerr-akert-rnem, man-weny-rnem, warrkenh-rnem, atyetyart-rnem-akerr. <sup>17</sup> Rernemanap apek anthelhey-angenh, renh-rnem amperneyew. Kel nthakenh rernem ampwal-rnem payemeley-angenh, tharlemeley-angenh anem, arrangkw. Arraylenty arrwekeleny rewely 10-akert weth ra itna anyent-akert anenh. Itna ran namp ikwerenh ileyel. Kwerrm ampernentyan, itna arlkitwew ayntem intem-antey. <sup>18</sup> Artwa angwenhelap

namp renh iterl-arem? Tyak inngant, iterreyew array. Nampa artwewenharlap ran, 666-arl.

## 14

*Akngey-wenh yep-yep 144,000  
ikwerenh-rnem-then*

<sup>1</sup> Ikwer-penhan atha arew ingwer-angkwarr-anem altyerr-itwew. Akngey-wenh yep-yep akelyan rtnenh apwert ilkwa irrwerl-itwew. Apwertan itna Zion. Akngerr innga rtnenherrenh yep-yep ikwer-itwel, 144,000. Rlwitwew ingwerentyelan ingkwernew yep-yep-wenh itna Akngey ikwerenh-wenh itnethen.

<sup>2</sup> Athap ingwerenty angkerl-anenty-anem awew irrwerl-they. Atayel inngarlap ra angkewan, kwaty atnyerr-apeny, awely-awely ilkwapeny apek. Ayengan iterrew, "Mwerr-angker! Akngerr arrkenterrenty-apeny ampwal ketayapeny!" <sup>3</sup> 144,000 weth-rnem ingkerrenh rtnenherrenh Akngey-wenh chair mwerr-angker atyetyart-wenh arrwekel-ampeny-itwew, atnwenh iteth weth-rnem 4-then ampwa alkenh 24 weth-rnem-akerr. 144,000 rernem aylelherrew arreyng ngwampeny ingwerlkwer. Nthakenh ingwerentyak arreynew akaltyerrey-angenh. Rernemant iterl-arenh arreyng renh. Akngeyel renh-rnem ingwer-rnem-then ayerrpelew, ahern-they angkep akngey-alpeyew. Ra renh-rnem payemelew arrnga Jesus-wenhel. <sup>4-5</sup> 144,000 rerneman ingwer-itwew ayntey-angenh anewarterrem-apeny. Rernemap irrtwyerrey-angenh, apmwel-ayeth aney-angenh, arrangkw. Nthakenh

ingwerentyakel renh-rnem ayntarrpeley-angenh. Rernemap yep-yep akely renh apentenh ingweram-angkwarr. Akngeyel renh-rnem akngakew ahern-areny-rnem-they. Rap payemelemel ayerrpelew ikwer-atherr; Akngeyew yep-yep akelyew-then, rernemap mwerr-angkerarl ikwer-atherr-wenh, intem-antey.

### *Antyerl-rnem irrpety*

<sup>6</sup> Ikwer-penh atha arew antyerl ingwer-anem alkerelerrenharl. Ra angka mwerr-angker ilerl-apenh, angka rarl arraty innga intem-antey aneyel. Rap ahern-areny-rnemew ilerl-apenh, akngerr apmer arrpanenh-arenyew; angka ingwerek-ingwer angkeyel-rnemew, irrppwerlew-then arlterew-then arrkayew-then.

<sup>7</sup> Rap atayel innga angkenh, “Akngey nakenh-arey arrantherr, kwenerremel, mwanty-antey awelhemel mwerr antwemel! Rlengkan ra apetyeyel, ingkerr rnkerneyew ayernemel. Renh nakenh-arey! Rant anyentel ilek-ilek mpwarew; alker, ahern, alay, kwaty alapeltharr-then!”

<sup>8</sup> Antyerl namp 2-anem atha arew alkerelerrenharl. Rap angkerl-apenh, “Awelhenh-arey! Tawen Babylon-areny-rneman apmwa innga, rernemap ingkerr apmer arrpanenh-areny-rnem ilenh, 'Mwerr arrantherr apmwangkwarr mpweny aynteyew ingwer-rnem-then.' Aleyan rernem arrangkw-anem ywerrelhelew. Ilek-ilek aytnew, apmer ra arlpaw-anem aynteyelpew. Tawen ilkwa weth Babylon arrangkw-anem!”

9-10 Ikwer-penhan atha antyerl namp 3-anem arew alkerelerrenharl. Atayel ra angkerl-apenh, "Pwertay! Akngeyan aley ahelerreyel-anem weth-rnemew, kwenerreyelarlew arraylenty wethew, arwerl wethew-then rapenyew-then. Akngey ran ahelerreyel ikwer-rnem, rernemarl anthelhew, rlwa amperneyew, itep apek. Ya, ra ahelerreyenh inngarl ikwer-rnem, renh-rnem iwemel rwewarl kwert ikwakengwarl. Rernemap pwarrkerreyenh artnemel artewenty. Antyerl Akngey-wenh-rnemel yep-yep akelyel-then rernem aytareyenh, rernemarl pwarrk artneyenh. <sup>11</sup> Kwertan rwa ikwer-they intemarl arlwar anaynteyenh. Arltel ingwel-then rernem intem-antey artnayntem pwarrk. Nthakenh ltyerrey-angenh, ankwayntey-angenh, arrangkw. Alakenhaym aynteyenh ikwer-rnem, rernemarl kwenerrenh arraylenty ikwer arwerl wethew-then rapenyew-then, rernemarl anthelhew, renh-rnem itna ikwerenh-akert amperneyew."

<sup>12</sup> Alakenh-wety Akngey-wenh-rneman ipmelhey-angenh anaynteyew, rernemarl ikwer awelh-ayntem, Jesus renh intem apent-ayntemel.

<sup>13</sup> Ingwerenty-anem atha awew, irrwerl-they angkerl-anenty, "Alakenh ingkwerna pip-warl! 'Ingwer-rnem Jesus-arl apentenh-rnem, rernem iteth-tangkwel anenh ahern-itwew, rernemap ilwew-anem. Aleyanap rernem iteth aneyel inkwerelhemel!' "

Inweng Akngey-wenhel ran awew, rap tyernew, "Ya innga! Akngeyel iterl-areyel, rernem



artewenty ikwer warrkerrenh. Rernem ltyerremel ikwer-itwel aney-alpeyenh intem-antey.”

*Akngeyel ingkerrenh-antey  
rnkernemel ayerneyel*

<sup>14</sup> Ikwer-they atha irrwerl itnywenew. Athap anyent ingweran arew, Artwa Inngarl Akngey-wenh-apeny-anem, anenharl kwenpay arlter-itwew. Akapwert-itwewan ampwal mwekart-apeny atyetyart-wenh gold-penh. Itepelan ra napp arlpenty amper-amper antwerrkew, arreylp innga. <sup>15</sup> Antyerl ingweranem tyerrelhenhey-alhew Akngey-wenh tyaty ilkwethey irrwerl. Rap atayel arlkew, wetharl anenhew kwenpayel, “Napp ngkwenh ina! Amern weytan ampeng-anem ahern-itwew. Alheyew akemel ingkerr akarrelemel.” <sup>16</sup> Rap amern akew, antyerlel ilew-angkwarrarl. Napp ikwerenhel ra anamerl-antey akew, akarrelew amern weyt-rnem. Amern weyt picture talk-arlap ran, akngerr-apeny.

<sup>17</sup> Antyerl ingwer-anem tyerrelhenhey-alhew Akngey-wenh tyaty ilkwethey. Rap antwerrkew napp arreylp arlpenty amper-amper arrpemarl.

<sup>18</sup> Atha antyerl ingwer-anemarl arew, rwarl arntarnt-arenh, apwert ilperr-ilperr-itwewarl ampenh. Apwert ikwer-they ra anperl-alhew, atayel arlkenhew antyerl napp-akertew, “Napp ngkwenh ina! Amern grapes-an ampeng-anem ahern-itwew. Alheyew akemel ingkerr akarrelemel.” <sup>19</sup> Rap alhew akeyew, antyerlel ilew-angkwarrarl. Napp ikwerenhel ra anamerl-antey

akew, akarrelew amern grapes-rnem. Rap iwew irrka ilkwewarl, ingketyel-anem lthwaynteyew.

Grapes picture talk-arlap ran. Ran akngerr-apyeny, weth Akngeyew awelhey-angenh-rnem-apyeny. Ran ahelerreyel innganem ikwer-rnem.  
<sup>20</sup> Irrka ra Jerusalem arrer-apyeny. Rernem grapes lthwenh ikwer-itwew. Grapes-penh akarr thelhey-angenharl, arrangkw. Arrngarl raw! Arrnga ran ankalhenh ilpay intwer-itwew-apyeny, nantew-wenh akapwertew-atety. Rap ankalhenh arleng-alenty, 300 kilometre-ew-atety.

## 15

### *Antyerl-rnem 7 apmwa anthey-angker-rnem*

<sup>1</sup> Ikwer-theyan tyak ilkwa ingwer-ikwer-anem aremerrew alker-itwew. Athap apatemel itny-weneyelpew, antyerl-rnem 7 arew-anem apmwa anthey-angker-rnem. Akngeyan ahelerreyel innga apmwernemew, rap anthew arawerrng 7 antyerl ikwer-rnem, antheyew apmwernem akngerrew. Apmwarl ipmelheyelpeyenh-anem. Akngey ran ahelerrey-angenh-anem, arrangkw-anem. <sup>2</sup> Athap arew glass-apyeny-anem, ayn-tenharl arlperry irlwart innga kwaty-apyeny, alay ilkwapyeny. Kwaty alay ra amparrkenh rwa amperl-anenty-apyeny. Akngerr innga rtenherrenh alay impalth-itwew, weth-rnem rl-terrkarl anew-rnem arraylenty weth-angkwarr, kwaty alay-they tyerrelhewarl. Rernem renh antengelew, kwernerrey-angenh ikwer. Ampwal weth rapeny apwert-penharl mpwarew, ikwer

rernem kwenerrey-angenh arrpemar. Namp ikw-  
werenh atnyeney-angenh rlwitwew itep-itwew-  
then, arrangkw, 666 wethey. Akngeyelan renh-  
rnem anthew ampwal ketay-apeny-rnem-anem.  
<sup>3</sup> Rernemap aylelherrenh Moses-wenh arrey-  
n weth, angkakert Akngey-wenh awank-akerrarl  
anenh. Arrey- n ingweran yep-yep akely-wenh  
rernem aylelherrenh arrpemar alakenh:

“Akngey ngant anyent rlterrk arawerrng ilkwak-  
ert.

Ngan *Atyetyart Ilkwa Ingkerrenhew.*

Ilek-ilek mwerr-angker mpwaremel,

intem-antey arraty-angkwarr mpwarem.

Ngan atyetyart ilkwa aneyel apmer arrpanen-  
hew!

<sup>4</sup> Ingkerrenhel nakemer mwerr-angkwarr,

itna ngkwenh mwerr antwemel.

Ngant anyent mwerr-angker inngan.

Ngkweng mwanty awelhem,

ngkweng-warl-athek mwanty ilelhemel.

Akgerr apmer arrpanenh-arenyel areyenh,

ntwarl arraty-angkwarr mpwarem intem,

rernemap arleng-they apeyarr-alheyenh,

ngkweng-warl-athek kwenerreyew.”

<sup>5</sup> Ikwer-they atha irrwerl itnywenew arrpe-  
marl. Akngey-wenh tyaty ilkwa rtnenh, arri-  
wan altywerarl. Kwenan rtnenh kalikw impen  
Ingkart-wenh, Akngey rarl ikwer-itwew aneyel.

<sup>6</sup> Tyaty ilkwa ikwer-they antyerl weth-rnem <sup>7</sup> ty-  
errelhew, apmwa anthey-angker-rnem. Rernem

arnkwa arlpenty-akert arlter innga. Arnelty-angkwarr ikwer-rnem-itwew pilt gold-penh amparrkew. <sup>7</sup> Atnwenth 4 iteth weth-rnem rtnenh-antey. Anyentelan irrkwa akely-rnem 7 gold-penh anthew antyerl 7 weth-rnemew apmwa anthey-angker-rnemew. Akngeyelan ngkwarl wayn-apeny-anem thelew irrkwa 7 ikwer-rnem-warl. Alakenh ra ahel inngarl irrewan. Rarlap ran, intemarl aneyel, rap ahelerrem innga akngerr apmwernemew. <sup>8</sup> Kwert ilkwa tyerrel-hew tyaty ilkwa ikwer-they, Akngey rarl anenh arawerrng ilkwakert. Nthakenh ingwerentyan aylpey-angenh tyaty-warl kwert-wety, arrangkw-antey. Alerl-antey ingwer-ingwerant rernem aylpayntem. Antyerl 7 weth-rnem-tangkwel ipmelhem, apmwarl anthem-penh.

## 16

### *Antyerl-rnem 7-el apmwa antheyneyel anyentel-anyentel*

<sup>1</sup> Ikwer-theyan atha awew, ingwerenty arlkenharl atayel innga tyaty ilkwitwew. Rap angkew antyerl 7 weth-rnemew, “Alhenh-arey arrantherr! Irrkwa 7 akngenh-arey wayn-apeny-akert. Thelenh-arey-anem ahern-warl! Alakenhan akngerr ahern-areny-rnemel iterl-arem, ayengarl ahelerrem innganem ikwer-rnem!”

<sup>2</sup> Antyerl namp 1-tangkwel alhew, theleyew irrkwa ikwerenh-they ahern-warl. Anamerl-antey akngerr-anem arntetyerreyelpew, tywen

apmwa akngerr-akert pwarrkerremel. Rerneman akngerr weth-rnem namp arraylenty weth-wenh-akert. Kwerrman rernem atnyenew arlkitwew namp-akert. Rernemap kwernerrem ampwal rapeny-warl apwert-penh-warl.

<sup>3</sup> Antyerl namp 2-anemarl alhew, theleyew irrkwa ikwerenh-they kwaty alay-warl. Anamerl-antey alay arrnganem irreyelpew, rap ikwakeng inngarl intenharl, arrnga ra ipmewenh. Ilek-ilek kwaty alayel anenharl ilwernerrew.

<sup>4</sup> Antyerl namp 3-anemarl alhew, theleyew irrkwa ikwerenh-they ilpay-rnem-warl ngenty-rnem-warl-then. Anamerl-antey kwaty arrnganem irreyelpew. <sup>5</sup> Antyerl ingweran angkewanem. Ran kwaty ingkerrenh ahern-itwew arntarnt-arey-angker anenh. Atha renh awew, Akngeyew alakenh angkenty,

“Akngeyay, ngan arrwekeleny anenh, ahern nhenharl arnwarney-angenhel-antey.

Iteth nga aneyel, iteth nga anayntem intem-antey.

Ntwa anyentel mwerr-angker mpwarem, arraty ingkerrew mpwarem.

Apmwernemewan nga awakelhew. <sup>6</sup> Apmwa weth-rnemelan Akngey-wenh-rnem atwew ipmew artwa angkakert ikwerenh-rnem-then arrngew-antey.

Alakenhan ntwa renh-rnem arrnganem anthew, rernem antyweyew.

Arraty-angkwarr ntwarl alakenh mpwarew!”

<sup>7</sup> Athan ingwerenty-anem awew arlkewarl. Ra rtenh apwert ilperr-ilperr-itwew, kwert mwerr-angkerarl arlwar anem-itwew. Apwert ra ayntenh arrwekel-ampeny chair mwerr-angker Akngey-wenh-itwew.

“Ya, Ingkart Akngey! Ngan *Atyetyart Ilkwa Ingkerrenhew!*

Ntwa apmwerneman atwem!

Alakenh-anyem ntwa apmelerr mwerr-angkwarr mpwarem,

intem-antey arraty-angkwarr iterremel!”

<sup>8</sup> Antyerl namp 4-anemarl alhew, theleyew irrkwa ikwerenh-they itwern-warl. Anamerl-antey itwern rwenp innganem irreyelpew. Akngeyel ilew, ingkerrenh amperneyew, renh-rnemap ipmew atwey-angenh. <sup>9</sup> Rerneman ahelerrew innga, rwitwew ampemel. Rernemap Akngey apmwarl antwenh arrarletyel itemel, rarl ilek-ilek apmwa tyarlewenh. Rernemanap angkeperrey-angenh ikwer-warl, renh mwerr antwey-angenh, renh nakey-angenh, arrangkw.

<sup>10</sup> Antyerl namp 5-anemarl alhew, theleyew irrkwa ikwerenh-they chair arraylenty weth-wenh-warl. Chair ikwer-itwew arraylenty ra anem atyetyart ilkwa akngerrew. Apmeranap ikwerenh atemwengk-anem irreyelpew. Akngerran ikwerenh-rnem pwarrkerrenh artewentyel. Aleny rernem akwarlkelhenh pwarrk. <sup>11</sup> Rernem ahelerremel Akngeyan apmwa antwenh-antey, tywen-rnemarl

pwarrkerrenh-antey. Rernemap angkepperrey-angenh-antey ikwer-warl-athek, apmwarl mpwarenh-penh, arrangkw.

<sup>12</sup> Antyerl namp 6-anemarl alhew, theleyew irrkwa ikwerenh-they ilpay ilkwewarl itna *Euphrates*. Anamerl-antey kwaty ankalhey-angenh irreyelpew, arlwereng-anem artwerrety irreyelpew. Akngeyelan alakenh mpwarew, artwa atyetyart ilkwernemaw ahern artwerrety-angkwarran alheyew artwa army-areny-rnem-akert ikwer-angkwarr akngerrakw-they. <sup>13</sup> Atha inweng apmwernem irrpety-anem arew, perak-rnem-apeny rerneman. Ingweran tyerrelhew rt-nwem weth-wenh arrakert-they, ingweran array-lenty weth-wenh arrakert-they, ingweran artwa angkakert-wenh arrakert-theyarl, wetharl ir-tywerremel ilenh. <sup>14</sup> Inweng apmwernemel ilek-ilek mpwarenh arawerrng rlterrk-akertel. Rernemap alhew apmer arrpanenh-warl ahern-itwew, atyetyart-rnem arlweleyew, rernemaw atwerreyew Akngey-then. Akngey ranap renh-rnem antengeleyen ingkerr.

<sup>15</sup> Jesus rantey angkew-anem, “Awelhenh-arey arrantherr! Ayengan apetyeyenh anyelkelan, artwa irrtyert-awarr-apeny kwenyel! Ingwerenty apek atyek mpwelhem, arntarnt-arelhemel atyeng, rap inkwerelhem. Ra arnkwakert-apenyan mpwelhem, nyerrerrey-angelhel. Ingwerentyanap arnkweny-apenyarl anerl-aneyenh, ingwer-rnemel renh-rnem arerl-aneyenh.”

<sup>16</sup> Ikwer-penhan inweng apmwerneman irrpety perak-apeny rernem arlkew atyetyart-

rnemew army-areny-rnemew-then. Rernem renh-rnem ilanthew, akarr-akarrerreyew apmer anyent-itwew. Angka Hebrew-el apmer itna *Armageddon*.

<sup>17</sup> Antyerl namp 7-anemarl alhew, theleyew irkwa ikwerenh-they alker-warl. Anamerl-antey ingwerentyan atayel arlkew Akngey-wenh chair ilkwa mwerr-angker-they tyaty ilkwitwew alakenh, “Kel-antey! Ipmelhew-anem!” <sup>18</sup> Awely-awely-anem arrkew, atayel angkemel. Ahern arrewew artewenty innga, iltewelhew-anem. Ranap aleyant arrewew alakenh, ingwerentyelarlarl alakenh arey-angenh-antey. <sup>19</sup> Tawen ilkwa Babylon atakelhew, apwert-rneman arlperry ayntew. Tawen-rnem irrpety-anem ikwer-itwew aynteyelpew. Tawen ingwer-rnem-then apmer arrpanenh-itwew rerneman atakelhew arrpe-marl. Akngeyel iterl-arew, akgerr apmer ikwer-areny-rneman apmwangkwar anenh, rap ahel-errew artewenty innga ikwer-rnem, renh-rnem ilwerl-athenew ipmew. <sup>20</sup> Ahernan arrewenharl, akwerlp akely-rnem ampep-itwew alay-itwew rernem ingkerrenh aylperl-alhew-anem kwaty-warl ywerremel. Apwert ingkerr ywerrerl-alhew. <sup>21</sup> Aperrkwer-rnem-anem aytnew alker irrwerl-they, awerr innga ayen-apeny. Ingkerrenhel atwew artwethen arelh-then, pwarrk ilkwa anthemel. Rernem ywarn iterrew, nthakenh irrem. Akngeyan rernem apmwa antwenh-antey, rarl renh-rnem alakenh atwew.



*Arelh apmwethen arraylenty-then-akert*

<sup>1</sup> Antyerl 7 weth-rnem rernem rtnenh-antey, irrkwa arltwernem antwerrkenh. Ingweran apetyew atyeng-warl, rap angkew, "Apetya atyeng-angkwarr! Atha ngkweng lwewar-rerneyew arelh apmwa innga. Akngeyel renh ipmew atweyenh. Ran ilem tawen ilkwa Babylon, wetharl rtneyel ilpay kwaty-akert akngerr-itwew. Arelh ra ayntem apmwangk-warr artwa akngerr-itwew apmer arrpanenh-itwew, man ineyew. <sup>2</sup> Atyetyart ilkwernem apmer arrpanenh-they apetyenh, ayntaynteyew ikwer-itwew, rernemap apmwerrew rapeny-anem. Rernem apmwa anthelp-anthew arntety-apeny, akngerr ingkerr apmer arrpanenhel apmwerrew-anem. Rernemap ilkelhew, alak-enh irreyew intem-antey, wetharl ngkwarl antytwenty-apeny."

<sup>3</sup> Ikwer-penhan Inweng Akngey-wenh-anem atyeng-warl aylpenhey-alhew. Antyerl irrkaty ra ayenh akngew apmer artwerrety-ampeny-warl-anem. Apmer ikwer-itwew atha arelh arey-alhew, irrwerl anerl-anenty arraylenty rnter-rnter-itwew. Ranap akapwert 7-akert, rewely 10-akert. Arlkitwew angka apmw-ernem arlperry ingkwernew, Akngey arrken-telhelemel. <sup>4</sup> Arelh ra arnkwa mwerr-angker rnter-rnter-akert. Rap atnyenew apwert ilek-ilek mwerr-angker, nikeleth iylpew-arelh-then gold-penh. Irrkwa ra antwerrkenh, gold-penh. Irrkwa ikwer-itwew ilek-ilek apmwa ingkerr, rarl mpwarenh. Artwa akngerr-itwew ra aynterl-apenh. <sup>5</sup> Ingwerentyel itna ingkwernew rl-

wewarl. Itna arlpentyarlap ran, alakenhap aynteyel:

“Ayengan tawen ilkwa Babylon.  
Weth-rnemel akgerr-itwelarl aynterl-apem,  
rernemap ayenh *amey* antwem.  
Ilek-ilek apmwel-then ayenh *amey* antwem  
arrpemarl.”

Itna ranap arrngertelengkw-tangkwel aynteyel, nthakenh iterl-arey-angenh-anem.

<sup>6</sup> Atha arew, arelh ran ngkwarl antytwenty-penh-apeny anenh, terangk. Ran Akngey-wenh-rnem intem-antey ipmew atwenh, angka Jesus-akertarl ilerl-apenh-rnem. Renh-rnem ipmew atwenty-penh rap inkwerelhenh-anem, terangk-apeny. Atharl renh arew, ayengap apateyelpew.

<sup>7</sup> Antyerl angkew atyeng, “Ilekew nga apateyelpew? Ntwa arelh weth iterl-areyel arraylenty-then, akapwert 7-akert-itwew rewely 10-akert? Arelhan ikwer-itwel aneyel. Atha ngenh ilem, ntwa arraty-angkwarr iterl-areyew-away. Atha ngkweng anayntelem-anem arrngertelengkw renh. <sup>8</sup> Arraylenty ntwarl ngwamp arew, ra iteth-tangkwel anenh, rap ilwew-anem. Ntwa iterl-areyel, Akngeyel itnernem ikwerenh-rnem-wenh ingkwernew pwek ikwerenh-warl awank-akerr, ahern-then alker-thenarl arnwarney-angenhel-antey. Itna ingwer-rneman arrangkwarl. Rernemarl arem arraylenty renh, rernemap apateyelpeyenh.

Rernem angkerreyenh, 'Pwertay! Arraylenty yanhan iteth-tangkwel anenh, rap ilwew-anem. Iteth-anemarl irreyenh!' Alakenh rernem angkerreyenh. Ingwer-ingweran ra irrka intwer ikwer-they tyerrelheyenh arrpemarl angkep-antey. Akngeyelanap arraylenty renh ywerrelheleyenh intem-antey-anemarl." Alakenhan antyerl angkew atyeng.

<sup>9</sup> Antyerl ra atyeng ilew arrpemarl arraylenty renh. "Nga apek tyak innga, ntwap iterl-arem angka nhenh? Akapwert 7-el ilem apwert 7, arelh rarl aneyelel. <sup>10</sup> Akapwert-rnemel ilem atyetyart 7 arrpemarl. Atyetyart 5-an kel-antey ahaperrew, ingweran atyetyart aneyel-antey apmer ikwerenh-itwew, ingweran alerl-anteyarl apetyem. Rarl atyetyart irreyenhel, ranap arleng-alenty aney-angenh, arrangkw. <sup>11</sup> Atyetyart ingwer-anem aremerreyenh, atyetyart 7 ingwer weth-rnem-apeny, atyetyart namp 8. Ran arraylenty weth, rarl iteth-tangkwel anenh, ilwew-anem ra. Akngeyelan renh ywerrelheleyenh." Alakenhan antyerl angkew atyeng.

<sup>12</sup> Antyerl ra ilenh-antey atyeng arraylenty renh. "Rewely 10, ntwarl ngwamp arew, rernem ilem artwa ilkwa 10 ingwer-rnem. Rerneman atyetyart aney-angenh-antey, alerl-antey. Ingwer-ingweran rernem anerl-aneyenh arraylenty weth-itwew, atyetyart anerl-aneyenh ingkerrew. Rernemap atyetyart arleng-alenty aney-angenh, arrangkw. Atyetyart rernem aneyenh arwa arrer-antey angath-antey, arlta anyentelant apek. <sup>13</sup> Rernem iterreyenh, anyenter-

reyew, arraylenty renh rlterrkeleyew alakenh angkemel, 'Ngant anyent atyetyart ilkwane aneyew ingkerrew. Anantherran ngkwengant awelhemarl.' <sup>14</sup> Atyetyart 10-then arraylenty weth-then rernem alheyen, yep-yep akely-then atwerreyew. Nthakenh yep-yep akely renh atwey-angenh ipmew, arrangkw. Rant anyent Inkart, *Atyetyart Ilkwa Ingkerrenhew* aneyel. Rap renh-rnem ywerrelheleyen. Ikwerenhrneman ikwer-itwel anerl-aneyen. Ra renhrnem rlwanew arrwekel-antey, rernemap renh apentem arraty-angkwarr." Alakenhan antyerl angkew atyeng.

<sup>15</sup> Antyerlel atyeng ilew arelh apmwa renh. "Altyerr-angkwarr ntw a arew apmer ilkwa, wetharl rtneyel ilpay kwaty-akert arrpanenhitwew. Ilpay rernem ilem apmer arrpanenhareny-rnem, angka ingwerek-ingwerarl angkemel. <sup>16-17</sup> Ntw a iterl-areyel rewely 10 weth-rnem, atyetyart ilkwa 10 weth-rnem ilemarl? Kel Akngey ran atyetyart 10 weth-rnem arnew, rernem pweyterreyew, arraylenty rlterrkeleyew arawerrng ilkwakertel. Arrwekel Akngey iterrew arrpemar, alakenharl aynteyen. Arraylenty ran atyetyart aneyen arlta ikwerewatety, Akngeyarl renh ywerrelheleyenhel. Alakenhan inngarl aynteyen, Akngeyarl ilew arrwekel-antey. Rernem pweyterreyen arraylenty ikwer-warl, rernemap ilkelheyangenh irreyen arelh apmwa wethew, rernemap arlekerremel renh atweyen. Ilek-ilek mwerr-angker ineyen ikwer-the, arnkwa lhelp-lhelemel. Nyerr-anthenty-pen rernem

tyelk arlkweyenh, arlka iwemel rwewarl.

<sup>18</sup> Arelh apmwa, ntwarl arew, ra ilem apmer ilkwa weth. Apmer ikwerew-artey ra atyetyart aneyenh atyetyart ingkerrew ahern-itwew.” Alakenhan antyerl atyeng angkew.

## 18

### *Tawen ilkwa Babylon arrangw-anemarl*

<sup>1</sup> Ikwer-theyan atha antyerl ingwer-anem arew altyerr-angkwarr, irrwerl-theyarl atwarrenhey-alpenh arawerrng rlterrk-akert. Ran artewenty amparrkenh, lyenenty arrtyernew apmer arrpanenh-itwew ahern-itwew. <sup>2</sup> Ra atayel arlkenh alakenh:

“Arrangw-anem! Tawen ilkwa Babylon atakel-hew!

Apmwamwan-rnemant aneyel-anem yanh-itwew:

inweng apmwerneman, arrenty-rnem,

antyper-rnem, thip irrpwerl-rnem-then.

Moses-an angkew, ‘Yanh-lkwer arlkwey-angenh!’

<sup>3</sup> Apmer yanh-areny-rnemel intem apmwel-ayeth mpwarenh.

Rernemap ayntenh ingwer-rnem-itwew apmwangkwarr.

Akngerr apmer arrpanenh-areny alhenh apmer yanh-warl,

renh-rnem iwarrerneyew, apentemel apmwangkwarr.

Atyetyart apmer arrpanenh-areny alhenh apmer yanh-warl,

ilek-ilek apmwel-ayeth mpwareyew irrkaty-  
 angkwarr.  
 Ingwer-rneman apmer arrpanenh-areny  
 tharlemeley-angker rernem alhenh apmer  
 yanh-warl,  
 ilek-ilek mwerr-angker tharlemeleyew ankety-  
 rnemew,  
 man akngerr inaynteyew ikwer-rnem-they.  
 Ingkerrenh arwengk-arwengk irrenh ngkwarl  
 antytwenty-penh-apeny.”

<sup>4</sup> Atha awew ingwerentyak-anem, irrwerl-  
 theyarl arlkenty alakenh:

“Atyenh-rnemay! Awelhenh-arey atyeng!  
 Iwerl-alhenh-arey apmer apmwa yanh!  
 Anerl-aney-angenh apmwernem-itwew yanh.  
 Apmwangkwarr iwarrerney-angenh,  
 athan arrenhantherrenh atwewerr arrpemarl,  
 irrkaty-angkwarr atha renh-rnem atweyenh-  
 apeny artewenty.

<sup>5</sup> Rernem intem-antey apmwel-ayeth mpwarem,  
 apmwa weth mpwer tywenem-apeny alkerew-  
 atety.

Akngeyelan renh-rnem iterl-areyel kanper,  
 rernemarl apmwel-ayeth mpwarem.

<sup>6</sup> Rerneman arrenhantherrenh intem-antey irrw-  
 ernenh.

Atwenh rerneman arrenhantherrenh artewenty,  
 artewenty inngarl renh-rnem-anemarl angkep-  
 antey atweyew!

Angkep atweyneyew artewenty innga apmwa  
 yanh-rnem!

7 Rerneman ankety anenh, nakelhemel intem-antey.

Apwert akngerr-akert, arnkwa akngerr-akert, ilek-ilek mwerr-angker-akert.

Rernem angkenh, 'Anantherr atyetyart aneyel akngerrew apmer arrpanenhel.

Anantherr artnemel aney-angenh akertemwengk, arrangkw.'

Kel arrantherran renh-rnem-anem awakelhemel akertemwengk amperrgeleyew!

8 Tangkemel rernem angkenty-penh Akngeyel renh-rnem anamerl-antey court-emelemel artewenty atweyenh arawerrng ilkwa ikwerenh-akertel.

Rernemap angayakwarl anerl-aneyenh akertemwengk,

pwarrkerreyenh arntety ilkwakert,

Rernemap ilwernerreyenh-anem.

Akngeyelan rwa thweneyenh apmer Babylon-warl,

rap amperl-aneyenh ywerreyew-atety."

Alakenhan antyerl ingwerentyak atyeng angkew.

9 Tawen yanh an amperl-aneyenhel, kwert akngerr arlwa anerl-aneyenh ikwer-they. Ingkerrenhelan areyenh. Atyetyart apmer arrpanenh-areny-rnem rerneman apmer yanh-warl alhenh, ilek-ilek apmwa mpwareyew. Rernemap apmwangkwarl ayntenh ingwer-rnem-then apmer ikwer-areny-rnem-itwew - apwert akngerr-akert, arnkwa akngerr-akert, ilek-ilek mwerr-angker-akert. Rernemap kwert

areyenh, artnemel artewenty arrangkeyenh apmer ikwerew, atyetyart yanh-rnem. <sup>10</sup> Arlengthey rernem apmwa yanh arerl-aneyenh. Rernemap atererreyenh, nthakenh arrerapeny alhey-angenh, Akngeyelarl renh-rnem artyewerr arrpemarl. Artewenty inngey rernem artneyenh alakenh angkemel:

“Atyewey pwertay! Irrepern-rnem Babylon-areny-rnemay! Ywerrelheleyenh ingkerrenh-antey!

Rernem anenh atyetyart-tangkwel, aleyan arrangkw-anemar!

Tawen ikwer-rnem-wenh ilkwa rlterrk anenh! Artwa army-areny akngerrelan tawen renh arntarnt-arenh!

Aleyan Akngeyel anamerl-antey tawen renh ywerrelheleyenh-anem!”

<sup>11</sup> “Tharlemeley-angker-rnem rernem-then arrangkeyenh tawen ikwerew arrpemar, iney-angker-rneman ingkerr-anemar! ipma aneyel. Nthakenh man iney-angenh-anem, arrangkw-anem. <sup>12</sup> Rernemap apateyelpyenh, ayernerr-aynteyenh-anem, ‘Angwenhel-aneman anewanherr-itwew gold, thilp, man ilek-ilek mwerr-angker-then ineyenh? Angwenhel-anem anewanherr-itwew ineyenhan arnkwa mwerr-angker, arwerl mwerr-angker intenty-then? Angwenhel-anem anewanherr-itwew ineyenhan ilek-ilek arwerl-penh, apwert-penh, ayen-penh-akerr? <sup>13</sup> Angwenhel-anem anewanherr-itwew ineyenhan ilek-ilek



mwerr intenty alyerremwey-then, ngkwarl wayn, anter olive, pelaw-akerr? Angwenhel-anem anewantherr-itwew ineyenhan pwelek-rnem, yep-yep-rnem, nantew-rnem, pakey-akerr? Angwenhel-anem anewantherr-itwew ineyenhan irrepern-rnem, anantherrarl pwerep-anthenh, arwa arrangkwew warrkerreyew? Nthakenh ingwerentyel ilek-ilek iney-angenh-anem anewantherr-itwew, arrangkw-anem!' Alakenh iterr-aynteyenh tharlemeley-angker yanh-rnem.

<sup>14</sup> Rernemap angkeyenh alakenh, 'Tawen Babylon-ay! Arrangkw-anem! Ngan apmer ilkwetangkwe anenh. Aleyanap ilek-ilek mwerr-angker ngkwenh-rnem arrangkw-anem. Nga ilek-ilekek ahenty anenh, rernemap arrangkw-arem. Man ngkwenh arrangkw-anem irrew. Nthakenh inenhey-alpey-angenh, arrangkw.' Alakenh-anyem rernem angkerl-aneyenh. <sup>15</sup> Rernemap man akngerr innga inenh, apmer ikwer-warlarl alhenh, ilek-ilek tharlemel-aynteyew. Arleng-they rernem arerl-aneyenh. Rernemap atererreyenh, nthakenh arrer-apeny alhey-angenh, Akngeyel renh-rnem arrtewerr arrpemar. Rernemap artneyenh artewenty inngey, <sup>16</sup> alakenh angkemel:

“ ‘Pwertay! Irrepern Babylon areny-rnem!  
Arrangkw-anem ingkerrenh-antey!

Tawen ikwer-rnem-wenh ilkwa inngarl anenh!  
Arnkwa arlkeny-arlkeny-warl rernem aylpenh!  
Arlkitwew ilek-ilek gold-penh arrernew apwert  
mwerr-angker-rnem-then!

17 Akngeyelanap ilek-ilek mwerr-angker  
anamerl-antey ywerrelhelew-anemar!’

“Akgerr ingwer-rneman kwaty alayel  
artarnpenhew rtnwangkwarr, man ineyew  
apmer arrpanenhel. Rernemap arleng-they  
arerl-aneyenh warrkenh ikwer-rnem-wenh-  
thenel. <sup>18</sup> Kwert rernem arerl-aneyenh,

arlwar anerl-aneyenh rwa ilkwa inngethey  
apmer ikwer-itwew. Rernemap angkerrerl-  
aneyenh alakenh, ‘Tawen ingwer-rneman  
tawen nhanyem-weny. Tawen nhenhan ilkwa  
ingwer-rnem-angkwarrarl.’ <sup>19</sup> Rernemap

akapwert-warl ahern arrerneyenh, rernemar  
amperrngerreyenh apmer yanh-areny-rnemew,  
artewenty inngy artneyenh alakenh angkemel:

“ ‘Pwertay! Irrepern Babylon areny-rnem!  
Arrangkwanem ingkerrenh-antey!

Akgerr ingwer-rneman apmer ikwer-warl al-  
henh, kwaty alayel artarnpenhemel rt-  
nwangkwarr,

ilek-ilek tharlemeleyew, man inaynteyew tawen  
ikwer-areny-rnem-they.

Aleyan Akngeyel tawen renh  
ywerrelheleyelpew-anemar!’

20 Irrwerl-areny-rnem arrantherran  
inkwerelhenh-arey-anem! Apmer apmwa  
yanh arrangkw-anem!

Inkwerelhenh-arey-anem Akngey-wenh-  
rnemay! Inkwerelhenh-arey-anem  
kwertengerl Jesus-wenh-rnemay!  
Inkwerelhenh-arey-anem artwa  
angkakert Akngey-wenh-rnemay!

Babylon areny-rnemelan arrenhantherrenh  
 atwenh, pwarrk ilkwa anthemel.  
 Aleyanap Akngeyel renh-rnem angkep atwew  
 irrkaty-angkwarr.”

<sup>21</sup> Ikwer-penhan antyerl ilkwel apwert ilkwa  
 irrwerlelew, kwaty alay-warl-anem iwew. Rap  
 angkew:

“Athap apwert ilkwa iwew kwaty alay-warl, raw  
 ywerrey-alhewarl.

Kel alakenh Akngeyel tawen renh Babylon  
 ahern-warl iweyenh,  
 ran arrangwerreyelpeyenh. Nthakenh arey-  
 angenh-anem.

<sup>22</sup> Angwenhel arreyn mwerr-angker aylelhey-  
 angenh-anem apmer ikwer-itwew,  
 arrangkw-anem.

Angwenhel ketay-apeny inkwerelhemel  
 pelayerrey-angenh-anemarl.

Angwenhel terampet inkwerelhemel pelayerrey-  
 angenh-anemarl.

Arrangkw-anem, akeleyt-anem.

Angwenhel ampwal mwerr-angker-rnem nthak-  
 enh mpwarey-angenh-anem ikwer-itwew.

Angwenhel-anem ntang athey-angenh amernew,  
 arrangkw-anem.

<sup>23</sup> Tawen ikwer-itwew angwenhel-anem lye-  
 nenty arrtyey-angenh-anem.

Artwernem-then arelh-rnem-then nthakenh  
 itengerrey-angenh-anem.

Apmer ikwer-areny-rnem tharlemeley-angker-  
 rnem rernem tyak innga anenh.

Ingwer-rnem apmer arrpanenh-areny-rnem renh-rnem nakenh.  
 Nganger-akert-rnemel ingwer-rnem irrtwerl-ampnerenh apmer yanh-itwew.  
 Akngerr ingwer-rneman apmer arrpanenh-areny-rnem awelhenh ikwer-rnemew.  
<sup>24</sup> Tawen Babylon-areny-rnemel ipmew renh-rnem atwenh artwa angkakert Akngey-wenh-rnem.  
 Akngey-wenh-rnem ingkerrenh, akngerr ingwer-rnem-then rernem ipmew atwenh.  
 Alakenh-anyem Akngeyel tawen Babylon ywerrelhelew-anem ikwer-areny-rnem-then.”

## 19

*Akngeyel tawen Babylon ywerrelhelenty-penh, irrwerl-areny-rnemel renh nakerl-aneyenh*

<sup>1</sup> Antyerl ilkwan angkenty-penh, atha akngerr innga awew irrwerl-itwew, ingkerrenh atayel arlkenty alakenh:

“Aleleweya! Akngey nakey anantherr!  
 Rant anyentel anenhantherrenh itethelem ipmewety!  
 Ranap mwerr-angker, ingwer-rnem-apeny-weny, itwern-apeny arrtyernemel!  
 Rant anyent arawerrng ilkwakert!  
<sup>2</sup> Rant arraty-angkwarr ingkerrenhew apmelerr mpwarem,  
 lipwel-antey ingkerrenh rnkernem ayernemel.  
 Rap arelh apmwa renh arew,

rarl ingwer-rnem ilanthenh apmwangkwar, akngerr ahern-areny-rnem apmwelemel, ingwer-rnem-itwew ayntaynteyew apmer arrpanenhel.  
 Arelh yanhel Akngey-wenh-rnem ipmew-antey atwew.  
 Akngeyelanap renh awakelhemel atwew-anemarl.”

<sup>3</sup> Irrwerl-areny-rnem arlkew arrpemarl alakenh:

“Aleleweya! Akngey nakey anantherr!  
 Rarl tawen yanh rwa ilkwel arrtyew.  
 Kwert-rnem arlwar anayntem intem-antey.”

<sup>4</sup> Ampwa alkenh weth-rnem 24 atnwenh iteth weth-rnem 4-then rernem ingkerrenh kwen-errew atnertel-ayeth, Akngey renh nakemel. Ran aleth anenh chair mwerr-angker ikwer-itwew. Rernemap arlkew alakenh:

“Amen! Akngey nakey anantherr! Aleleweya!”

<sup>5</sup> Ikwer-penhan atha awew, ingwerentyarl arlkenty, rarl rtenh chair mwerr-angker ar-erenty. Ra alakenh arlkew:

“Akngey anewantherrenh nakey anantherr!  
 Warrkenh ikwerenh-rnemel renh nakem,  
 rernem ikwerarl mwanty awelhem,  
 ikwer-warl-athek mwanty ilelhemel.  
 Ilkwernem, akely-rnem, rlterrk-rnem, rlterrk-weny-rnem-akerr;

Ikwerenh-rnemel ingkerrenhel renh nakeyew!”

*Akngey-wenh yep-yep akely  
itengerreyel-anem*

<sup>6</sup> Atha akngerr-anem awew, akngerr innga arlkalhelerrenh atayel innga. Awely-awely-apeny angkenh, kwaty anyerr anterreyel-apeny alyarnp inngay. Rernemap arlkalhelerrenh alakenh-anyem:

“Aleleweya! Akngey nakey anantherr!  
Ingkart Akngey *Atyetyart Ilkwa Ingkerrenhew*  
ran alkenh aneyel ingkerrew!

<sup>7</sup> Renh inkwerelhemel nakey anantherr!  
Anantherr angkem ikwer, ‘Ngan ilkwarl, ingwer-  
rneman akelyarl!’

Akngey-wenh yep-yep akely itengerreyel-anem.  
Anewikw ikwerenh kel arnwarnelhew,  
mpwelheyel-anem ikwer.

<sup>8</sup> Akngeyel arnkwa mwerr-angker ngwampeny  
anthew, ra aylpeyew.”

(Anantherr iterl-areyel, arnkwa yanh-rnemel  
warrk mwerr-angker anaynteleyel,  
Akngey-wenh-rnemelarl ikwer  
mpwarew.)

<sup>9</sup> Antyerlan angkew atyeng, “Pip ngkwenh-  
warl angka nhenhan ingkwerna. ‘Akngey-  
wenh yep-yep akelyarl itengerreyenhel, akngerr  
ingwer-rneman akarrerreyenh, amern akngerr  
inkwerelhemel kwenty arlkweyew. Akngeyan  
ikwerenh-rnem yangkelhew, akarrerreyew  
ingkerrenh-antey. Rernemap inkwerelhem

ikwerew.’ ” Antyerl angkew arrpemarl atyeng, “Angka yanhan inngarl, Akngeyel ikwerenh-rnemew ileyel.”

<sup>10</sup> Athan awew, ayengap atnertel-ayeth kwenerrew arrwekel-ampeny antyerl-itwew. Ranap ayenh artwerelew, “Mentyaw! Alakenh kwenerrey-angenh! Ayenh nakey-angenh! Ayengan warrkenh Akngey-wenh ngapeny, ingwer-rnem angka Jesus-akertarl ileyel-rnem-apeny-then. Renhant nakaynteyew arrantherr!” Ingwerentyel angka Jesus-akert ilem, ra katy angkeyel Akngeyew arawerrng ilkwakert Inweng Mwerr-angker-wenh.

*Artwa anyent nantew ntwarlker-akert*

<sup>11</sup> Ikwer-penhan atha altyerr-angkwarr arew alker altywererrenty. Nantew ntwarlker-anem anamerl-antey aremerrey-alhew. Artwa anyent anerl-anenh ikwer-itwew. Akngerrel renh itnewem *Akngey-wenh Inngarl Arraty Ikwer Iterreyel*. Ranap ingkerrenh areyel. Rernem mwerranty aneyel apek, arrangkw apek. Aheng-arey rap apmwernemant atwem. <sup>12</sup> Annga atherran lherrm-apenyarl ampenh, akapwert-itwew mwekart mwerr-angker atyetyart-wenh akngerr. Arlkitwew ingkwernew itna ingwerlkwer. Ingwer-rnemel itna iterl-arey-angenh; rant anyentel iterl-areyel. <sup>13</sup> Artwa nantew-arenyel arnkwa arlpenty-akert. Ingwerentyel arnkwa renh arrkngewarl-tangkwel pwerlp-arrernew. Itna ingweran *Angka Akngey-wenharl*. <sup>14</sup> Artwa army irrwerl-areny-rnem akngerrel renh apentenh. Rerneman arnkwa ngwampeny

ararter-akert-rnem. <sup>15</sup> Arrakert ikwerenh-they tyerrelhew napp arplenty arreylp. Nayp ikwer-akertelan rap apmwernem athenemel atwem apmer arrpanenh-areny-rnem. Ra atyetyart ikwer-rnem anerl-aneyenh. Awelhey-angenh-rneman ra atwem kerwep-akertelarl. Rap renh-rnem ipelipeleyenh, lthwenhemel grapes-apeny. Alakenh-anyem ra ingkerrenh ileyenh, “Akngey *Atyetyart Ilkwa Ingkerrenhew* ra ahel-erreyel inngarl arrewantherr.” <sup>16</sup> Itna ingweran iyleper anyent-itwew ingkwernew arnkwitwew-then. Itna ra

*Atyetyart Ilkwa Ingkerrenhew.*

<sup>17</sup> Atha antyerl arew-anem, irrwerleng rtnehh ingkeny-itwew. Rap atayel arlkew thip-rnemew, alkererrenharl alker-itwew. “Apetyenh-arey ar-rantherr! Akarrerrenh-arey, aker-rnem arlk-veyew, Akngeyelarl antheyel!” <sup>18</sup> Apetyenh-arey, arlka ipmernem-wenh arlkweyew. Artwa nantew ntwarlker-arenyel renh-rnem ipmew-antey atweyenh; atyetyart-rnem, artwa ilkwernem army-areny-rnem, artwa ilkwa ingwer-rnem, nantew-rnem, nantew-artey-rnem-akerr. Rap ingkerr ingwer-rnem-then ipmew atweyenh ar-rpemar!; ingwer-rnem apmer arrpanenh-areny-rnem, atyetyart-rnem, warrkenh-rnem, ilkw-ernem, akely-rnem-akerr. Arrantherrap renh-rnem arlkwem!” Alakenh antyerl angkew thip-rnemew, rarl irrwerleng rtnehh ingkeny-itwew.

<sup>19</sup> Ikwer-penhan atha arraylenty renh arew arrpemar! Rarl rtnehh atyetyart apmer



arrpanenh-areny-rnem-itwew. Artwa army-areny ikwer-rnem-wenh rernem rtnenherrenh arrpemarl. Rernemap artwa nantew ntwariker-areny ikwer mpwelhenh ikwerenh-rnemewthen, ikwer-rnem-itwew atwerreyew.

<sup>20</sup> Artwa nantew ntwariker-areny ra arraylenty renh antwerrkew. Artwa angkakert wethan, rarl irrtwyerremel ilenh, renhap antwerrkew arrpemarl. Rap ilek-ilek tyak katy arnwarnenh arraylenty ikwer arawerrng apmwakert. Alakenh-anyem ra akngerr irrtwyerremel ilenh, renh-rnemarl ampernew rlwangkwar. Rernemap kwenerrenh ampwal apwert-penhew arraylenty-apeny. Artwa nantew ntwariker-arenyel ra arraylenty artwa angkakert-then iwew iteth-anteyarl rwa ilkewar, kwert ikwakengarl intenhar. <sup>21</sup> Rap army-areny ikwer-rnem-wenh ipmew atwew napp arlpenty-akertel, arrakert-they tyerrelheyelel. Thip weth-rnemel kwenty arlkwenh, tyelk arlkwemel.

## 20

*Arrenty ilkwa renhap arertneyel  
aherrety 1,000-ew-atety*

<sup>1</sup> Ikwer-penhan atha altyerr-angkwarr arew antyerl anyent, irrwerl-theyarl kwenel-athek atwarrenty. Rap key antwerrkew irrka intwer ikwer. Itep ingwerel ra tyeyn awerr arlpenty antwerrkew. <sup>2</sup> Athap arew-anem rtnwem arwekeleny weth. Ran arrenty atyetyart itnan Satan. Antyerlel renh antwerrkew, renhap

arrertnew tyeyn wethel. Antyerlel Satan renh arerteyenh arlengew-alenty, aherrety 1,000-ew-atety. <sup>3</sup> Antyerl rap rtnwem-anem iwew irka intwer ikwer-warl, akentemel key-akertel artewenty inngey. Akententy nthakenh ingwerentyel altywereley-angenh aherrety 1,000-ew-atety, rtnwem ra tyerrelhewerr, ra apmer arrpanenh-areny-rnem irrtwyerremel ilayntewerr arrpemar. Irrkitwew renh antwerrkenty-penh aherrety 1,000-ew-atety, antyerlel ra renh tyarleweyenh-anem alerl-antey.

<sup>4</sup> Ikwer-penhan atha chair ilkwa mwerr-angker-rnem akngerr arew. Chair ikwer-rnem-itwew akngerr anew-anenh. Akngeyel arrwekel-antey ikwer-rnem anthew arawerrng ilkwa, ingwer-rnem court-emelemel ayerneyew. Rernemar iteth anenhel ahern-itwew, rernemap alhewer alhenh, angka Jesus-akert ilerl-apemel, angka Akngey-wenh-then awelhemel. Rernemap nthakenh kwernerrey-angenh arraylenty ikwer. Rernem kwernerrey-angenh ampwal ikwer-apeny mpwarewewarl. Nthakenh renh-rnem amperney-angenh rlwangkwarr itep-angkwarr-then. Ingwer-rneman arkarerrenh ikwer-rnem-wety, angka ikwer-rnem-wenh awelhey-angenh, rernemap renh-rnem atwew ipmew-antey, akapwert akerl-alhemel. Akngeyelanap renh-rnem itetheleynew, rernemap ilkwa aney-alpew Jesus Christ-itwel aherrety 1,000-ew-atety. <sup>5</sup> Nhenh-rnem-mernt itetherrew. Ingwer-rneman awenng-itwewarl aynterl-aneyenh-antey aherrety 1,000-ew-atety. Akngeyelap renh-rnem itetheleyenh-anem. <sup>6</sup> Arrwekeleny

weth-rneman ilwewarl-penh-rneman rernem arraty inngarl aneyel, iteth-anem, rernemap irrngerney innga. Nthakenh rernem ilwey-angenh arrpemarl. Nthakenh ingwer-rnemel renh-rnem iwey-angenh rwa ilkwewarl, arrangkw. Rernemap warrkerrerl-aneyenh Akngeyew Jesus Christ-ew-then aherrety 1,000-ew-atety, atyetyart-rnem anemel Jesus-itwel.

*Arrenty Satan renhap iweyel rwa ilkwewarl*

<sup>7</sup> Jesus Christ ra atyetyart anerl-anenty-penh aherrety 1,000-ew-atety, antyerl rap arrenty Satan renh irrka intwer ikwer-they tyarleweyenh. <sup>8</sup> Rap irrkethey tyerrelheyenh, apmer arrpanenh-warl ingwer-rnem-anem irrtwyerremel ilerlap-aynteyew ahern nhenh-itwew. Apmer yanh-rnemel itna atherr-akert, Gog-then Magog-akert-then. Arrenty Satan-el renh-rnem akarreleyenh ingkerrenh-antey artewenty atwerreyew, artwa army-areny akngerr inngew, alperr-apeny. <sup>9</sup> Rernemap alhew iwerr arrpanenh-angkwarr ahern nhenh-itwew, apmer Akngey-wenh-rnem-itwew aremerrey-alhemel, tawen ikwer-rnem-wenh-itwew-then. Apmer yanhewan Akngey artewenty ilkelheyel. Artwa army-areny-rnemap amperew Akngey-wenh-rnem, rernemap tawen ikwer-rnem-wenh-then amperew, atwerreyew ikwer-rnem-itwew. Akngeyelanap renh-rnem artwerew, rap rwa thwenew irrwerl-they, renh-rnem ywerrelheleyew. <sup>10</sup> Antyerlel arrenty Satan iwew rwa ilkwewarl, kwert ikwengarl intenharl. Rwa irrkaty-warl arraylenty-thenarl

artwa angkakert-then renh-atherrenhan iwew arrwekel-antey. Artwa angkakert wetharl irrtwyerremel ilenh. Rernemap artewenty inngey kwarnelh-aynteyenh, arrangk-aynteyenh arlta arrpanenhel itwernew ankwarengel-then aleth-antey.

*Akngeyelarl ingkerrenh-antey  
ayernerl-aneyenh-akert*

<sup>11</sup> Ikwer-penhan atha altyerr-angkwarr arew chair mwerr-angker ilkwa atyetyart-wenh, ntwarlkerarlap ran. Akngey rarl anenh chair ikwer-itwew. Ikwer-wety ahern-then alker-then anterrew, ywerrenhemel aleth-antey. <sup>12-13</sup> Athap ingkerrenh-antey arew-anem, arrwekel-antey ilwewarl ahern-itwew; ilkwernem-then, akely-rnem-then, atyetyart-rnem-then warrkenh-rnem-then-akert. Rernemap itetherrenhey-alpew-anem. Ingwer-rneman ilwew kwaty alay-itwew arrwekel-antey, ingwer-rneman awenng-itwewarl ayntenharl, ingwer-rneman ayntenh apmer itnan *Ipmernem-angketyarr-itwewarl*. Rernemap rtenherrenh arrwekel-ampeny-itwew chair ilkwitwew.

Pwek akngerr ayntenh ikwer-itwew. Pwek ingwer-rneman akentewarl, rernemanap angka akngerr-akertarl ilew, rernemarl anenh-akertarl, ahern nhenh-itwew. Akngeyelap pwek ingwer-anemarl akentewew. Pwek ranap impen ikwerenh, itna ikwerenh-rnem-wenh-akertantarl. Rerneman iteth intemarl anerl-aneyenh. Pwek-rnem arenty-penh Akngeyel ingkerrenh ayernew court-emelemel. Rernemap ingkerrenh-antey arrwekel-itwew rtney-alhew

chair ilkwitwew. Akngeyel renh-rnem-anem ayernew anyentarl-anyentarl, “Nthakenh ngan anenh ahern nhenh-itwew?” <sup>14-15</sup> Akngeyelap itna akngerr ingwer-rneman arey-angenh pwek impen ikwerenh-itwew. Renh-rnem ra iwew rwa ilkwewarl-anem. Alakenh-anyem rernem atherr-inger ilwew. Arrkwekel-antey rernem kel ilwew ahern-itwew.

Ra apmer itna *Ipmer-nem-angkyarr* iwew rwa ilkwewarl. Rap apmer ikwerew-artey-then iwew rwewarl, ranap itna *Ipma*.

## 21

### *Alker-then ahern-then rlengkeny-anem aneyel*

<sup>1</sup> Ikwer-penhan atha arew altyerr-angkwarr alker-then ahern-then rlengkeny. Alker awankeney-then ahern awankeney-then ywerrew-anem. Kwaty alayan ywerrew arrpemar.  
<sup>2</sup> Athap Akngey-wenh tawen arew, Jerusalem, rlengkeny-anem, amparrkenty-anem. Tawen ran irrwerl-they atwarrenhey-alpenh, mwerr-angkerarlap ran. Ranap arelh-malangk-apeny, yep-yep akely-itwewarl itengerrenh-apeny.  
<sup>3</sup> Ingwerenty-anem arlkew artewentyel inngey chair ilkwa ikwer-they,

“Rlengkan Akngey aneyel artwernem-then arelh-rnem-then-akert aleth-antey.  
 Rernemanap ikwerenh-rnem aneyel. Ran Akngey ikwer-rnem-wenh, rap renh-rnem arntarnt-areyel intem-antey.

<sup>4</sup> Rap anngwelty iparem annga ikwer-rnem-wenh-they. Nthakenh rernem ilwey-angenh-anem, arrangkw-anem.

Nthakenh rernem alpwely arrangkemel aney-angenh-anem, arrangkw-anem. Arlka kwarnelhey-angenh arntetyerrey-angenh, arrangkw-anem.

Ingkerrenhan ingwer-lkwer-anem, mwerr-angker innga. Ilek-ilek apmwa arrangkw-anem irreyenh.”

<sup>5</sup> Akngey ra anenh-antey chair arlter ilkwa ikwer-itwew, rap angkew,

“Awelhenh-arey atyeng! Rlengkan atha ilek-ilek ngwampeny mpwarem, mwerr-angker-anem!”

Rap angkew atyeng arrpemarl, “Angka nhenh ingkwerna pip-warl, arraty inngeyarlap ran. Ingkerrenh angka ikwer awalheyew.” <sup>6</sup> Ra atyeng angkew arrpemarl,

“Kel-antey! Irreyel-anem, ayengarl angkew-angkwarr. Ayengan arrwekel anenh, ayengap iteth intemarl anaynteyenh. Ingwerenty angkethakw apek, athap alhewer antheyenh kwaty mwerr-angker atyenh, kwaty ngenty atyenh. Kwaty ranap itetheley-angker, athap alhewer antheman. <sup>7</sup> Ingwerenty rlterrk apek rtnem arrenty-wenh-angkwarr-wety, rap inem

kwaty mwerr-angker renh atyenh. Ayengan Akngey ikwerenh aneyenh, ranap aleraty atyenharl aneyenh. Alakenh.”

<sup>8</sup> Ingwer-rnemanap arrangwarl. Rernemap rwa ilkwel anerl-aneyenh, aletharl ampaynteyenh-itwew, ikwakel kwert itntaynteyenh. Ingwer-rneman atererremelarl anenh. Rlterrkarl ayntenheng-arey rernem nyerrerenh, ayenh apentewerr. Ingwer-rneman awelhey-angenharl angka atyenhew, ingwer-rneman apmwangkwarrarl anenh, ingwer-rnemelan akngerr ipmewarl atwenh. Ingwer-rneman apmwangkwarr ayntenh akngerr ingwer-rnem-itwel. Ingwer-rnemelan pwentyel ayleh, arntety mpwarenh. Ingwer-rneman kwenerrenharl ampwal apwert-penh-rnemew arwerl-penh-rnemew-then. Ingwer-rneman irrtwyerl-amperney-angker-rnemar. Athan ikwer-rnem-wenh-angkwarr irrwareyel. Nhenh-rnem ingkerrenh ilweyenh atherr-inger. Ahern-itwew-tangkwel rernem ilwew, rwa ilkwitwew-anem ilweyenh.

<sup>9</sup> Ntwa apek antyerl weth-rnem 7 iterl-areyel irrkwernem 7-akert? Rernem thelew ilek-ilek apmwa ahern-warl. Antyerl anyentan angkew atyeng, “Mpa! Atha ngenh arelh anyent lwewarrerneyew. Ran Akngey-wenh yep-yep akely-itwew itengerreyenh.” <sup>10</sup> Inweng Akngey-wenhan atyeng-warl aylpenhey-alhewanem. Antyerl rap ayenh akngew irrwerl apwert ilkwewarl. Rap ayenh tawen Akngey-wenh-antey Jerusalem lwewarrernew. Tawen rap atwarrenhey-alpenh Akngey-they irrwerl-

they. <sup>11</sup> Tawen ra artewenty amparrkenh lyenenty Akngey-wenh-akert, glass-arl rlkeyel-apyeny itwernel, alakenh. <sup>12-13</sup> Wall ilkwa irrwerl innga arlpenty apwert-penhel tawen renh amperelew, keyt-rnem 12-akert. Ingwerentyel itna ingwerek-ingwer ingkwernew keyt ingkerrenh-itwew. Itnerneman 12-akertarl, amentew-ament rernemanap artwamp anyent-wenh alerikwrnem, ikwer-renh-wenh altyernem-then. Artwamp itnan ikwerenh Israel, awank-akerrarl anenh. Keyt ikwer-rnem-itwew anyentarl-anyentarl antyerl-rnem arntarnt-aremel rtnenh. Keyt-rneman alakenh rtnenh: akgerrakw-ampeny irrpety, antekerr-ampeny irrpety arpemar, ayerrerr-ampeny irrpety arrpemar, altwerl-ampeny irrpety arrpemar. Alakenh. <sup>14</sup> Rernem wall renh artew apwert ilperr-ilperr ilkwernem 12-itwew. Apwert-rnemel wall antwerrkenh, ra aytnewerr. Apwert-rnem-itwew itnernem 12 ingkwernew, kwertengerl Jesus-wenh-rnem-then.

<sup>15</sup> Antyerl irrkaty weth rarl atyeng angkenh, ra ampwal arlpenty antwerrkenh gold-penh ruler-apyeny, arraty measure-emeleyew-arelh. Rap iterl-areyew, nthakenh tawen ra rtnenh-angkwarrarl - ilkwa apek, akely apek. Keyt-rnem 12, wall arlpenty-then, ingkerrenh-antey ra measure-emeleyew. <sup>16</sup> Tawen ran square-apyeny rtnenh, box ilkwapenyarlap ran. Antyerl ra ampwal measure-emeleyew-arelh akgerringer arrernew tawen ikwer-angkwarr. Alakenh ra akgerrakw-ampeny-tangkwel measure-emelew. Arlpentyarlap ran, 2,400 kilometres.



Irrkaty-angkwarr ra antekerr-ampeny measure-emelew. Arlpentyarlap ran, 2,400 kilometres arrpemar. Ayererr-ampeny arlpenty arrpemar, 2,400 kilometres. Altwerl-ampeny arlpenty arrpemar, 2,400 kilometres. Irrwerl-warl-athek-anem ra measure-emelew ahern-they irrkaty-angkwarr, 2,400 kilometres, irrwerl inngey. <sup>17</sup> Wall-anem ra ampep-itwew measure-emelew, arlpaw apek, tyet apekar. 65 metres-arlap ran, arlpaw inngey. <sup>18</sup> Wall-an apwert mwerr-angker jasper-theyarl mpwarew. Tawen ranap mwerr-angker arrpemar, gold-penh mpwarew, glass-apeny arrtyernenh. <sup>19-20</sup> Apwert ilperr-ilperr ilkwa 12 weth-rnem-itwew apwert akely ilek-ilek alkeny-alkeny ayntew, rainbow-apeny arrtyerneyel; atherrk-atherrk, alker-alker, arlter, rnter-rnter, arrkeyt-arrkeyt, irrpwerl-anem. <sup>21</sup> Keyt 12 weth-rneman rernem mwerr-angker arrpemar, apwert arlwa ntwarlker-penh mpwarew. Apwert ranap kwart-apeny itnan pearl. Keyt ingkerrenh mpwarew apwert arlter arlwa ingwerek-ingwer-penh, ilkwarlap rerneman. Keyt-angkwarran atha arew kwen-warl iwerr arlpaw-anem. Mwerr-angker arrpemarlap ran, gold-penh mpwarew, glass-apeny arrtyernenh.

<sup>22</sup> Apmer Akngey nakaynteyew-arelh atha arey-angenh-antey tawen ikwer-itwew, arrangkw. Ingkart Akngey, Atyetyart Ilkwa Ingkerrenhew rantey tawen ikwer-itwew aneyel, yep-yep akely ikwerenh-then. Ratherrap ikwer-itwew aneyel aleth-antey, ingwer-rnemel renh-atherr alhewer-they nakaynteyew. <sup>23</sup> Ingkeny-

then alkent-then arrtyerney-angenh yanh-itwew. Akngey rantelap arrtyerneyelan, yep-yep akelyel-then arrtyerneyel rwel-apeny. <sup>24</sup> Alakenh-anyem akngerrel apmer arrpanenh-areny-rnemel areyenh anaynt inngey, arraty-angkwarr alheyew. Atyetyart apmer arrpanenh-areny-rnemel man akngetyeyenh, ilek-ilek mwerr-angker-rnem-then apmer ikwer-warl. <sup>25</sup> Itwernew-apeny aletharlap ran. Keyt 12 weth-rneman altywer aletharl ayntaynteyenh. Ingwer-rnemel nthakenh akentey-angenh. Apmer ilkwer-itwew nthakenh atemwengkerrey-angenh-anem. <sup>26</sup> Akgerr innigel apmer arrpanenh-arenyel ilek-ilek mwerr-angker akngetyeyenh apmer ikwer-warl, man-then arnkwethen. <sup>27</sup> Ampwal apmwerneman nthakenh akngetyey-angenh, arrangkw. Ilngem arrentyew perayerreyew-arelh nthakenh akngetyey-angenh, arrangkw. Apmwangkwarr aneyel-rnem-then irrtwyerremel iley-angker-rnem-then rerneman nthakenh apmer ikwer-warl alhey-angenh, arrangkw. Akngey-wenh-rnemant alheyenh. Yep-yep akely ikwerenhel iternem ingkwernew pwek ikwerenh-warl, itna ikwerenh-rnem-wenh-akertant. Rerneman iteth intemarl anerl-aneyenh.

## 22

### *Ilpay itetheley-angker-akert*

<sup>1</sup> Antyerlelan atyeng lwewarrernew-penh tawen rlungkeny Jerusalem, rap ilpay-anem

lwewarrernew. Kwaty irlwartarlap ran, glass-apeny arrtyernenh. Kwaty ranap chair mwerr-angker Akngey-wenh-they anterrenh, yep-yep akely ikwerenh-they-then. Kwaty nhelan itethelem intem-antey. <sup>2</sup> Iwerr arlpaw ayntenh tawen ampep-itwew. Iwerr ampep-itwewan kwaty anterrenh. Arwerl amern-akert-rnem lyapenh impalath atherr-itwew. Arwerl rerneman itetheley-angker arrpemar. Alkent arrpanenhel amern mwerr-angker-rnem ampengerrem arwerl ikwer-rnem-itwew, akngerrel arlkwaynteyew. Alperr arntety-penh mwerreleyew-arelh. Apmer arrpanenh-areny-rnem apetyew, alperr renh-rnem ineyew. <sup>3</sup> Apmwangkwarr aneyel-rneman nthakenh apmer ikwerel aney-angenh, arrangkw. Akngeyelan renh-rnem artwereleyenh, rernem ikwer-itwew aney-alpewerr. Akngey-wenh-rnemant aney-alpeyenh, ikwer kwernerremel mwerr antwemel. Chair mwerr-angker weth, Akngey-wenh-then yep-yep akely-wenh-then, ra rtnaynteyenh ikwer-itwew. <sup>4</sup> Akngey-wenh-rnemel renh areyenh-anem arrer-they. Itna ikwerenh rlwitwew ingkwerneyenh. <sup>5</sup> Nthakenh atemwengerrey-angenh tawen ikwer-itwew, arrangkw. Ikwer-areny-rnemel nthakenh ayernerrey-angenh alakenh, "Ay! Ilenger ingkeny tyerrelheyenh? Rwa mpwarey, anantherr areyew-awaty." Arrangkw, rernem alakenh ayernerrey-angenh. Akngey rant amentel arrtyerney-angker, lyenenty antheyenh aleth ingyey. Ikwerenh-rneman ilkwa anerl-aneyenh ikwer-itwew intem-antey.

*Jesus ranem apetyeyel*

<sup>6</sup> Antyerl ran angkew-anem atyeng, “Angka nhenhan ntwarl ngwangkant awew, arraty ingarlap ran. Angka ikwer awelh-aynteyew! Akngeyel awank-akerr artwa angkakert-rnem ilenh-apeny inweng ikwerenh-angkwarr, rerne-maw arraty ingwer-rnem ilaynteyew-awaty. Kel alakenh-angkwarran atha ngenh-anem ileyel, ntwaw ikwerenh-rnem ileyew, nthakenharl arwekelan aynteyenh.” Alakenh-anyem antyerl atyeng angkew.

<sup>7</sup> Jesus ran angkew-anem, “Awelhenh-arey atyeng! Ayengan ahern-warl alerl-antey atwarrerneyenh. Angka pwek nhenh-arenyew iylpareth awelheyel-rnem rerneman irrngerneyarl anerl-aynteyenh. Angka Akngey-wenharlap ran!”

<sup>8</sup> Ayengaw, John. Athap ingkerrenh ingkwernew, altyerr-angkwarrarl atha arew, angkernem-then atha awew. Ayeng atnertel-ayeth kwenerrew-anem, antyerl renh nakeyew, rarl ilek-ilek atyeng lwewarrernew. <sup>9</sup> Antyerl ranap angkew atyeng, “Mentyaw! Alakenh irrey-angenh! Nthakenh atyeng kwenerrey-angenh, arrangkw. Ayengan arwa warrkenh Akngey-wenh, ngapeny, artwa angkakert ikwerenh-rnem-apeny. Ayeng ikwerenh-rnem-apeny aneyel, angka pwek nhenh-arenyew awelheyelarl-apeny. Renhant nakaynteyew!”

<sup>10</sup> Antyerlel ayenh ilew-anem alakenh, “Angka pwek nhenh-itwew Akngey-wenhan. Alakenh-anyem ra aynteyenh. Nthakenh angka renh irrtyert-akwerney-angenh, arrangkw.

Angka alhewer ilerl-apaynteyew, ingwer-rnemel awaynteyew anaynt-antey. Arlta arrer-anemerreyel. <sup>11</sup> Akgerran apmwangkwarr-antey anayntem. Kel menty renh-rnem tyarleweyew, apmwangkwarr-antey anayntem. Akgerran apmwangkwarr ayntayntem ingwer-rnem-itwew, nyerrerrey-angenharl. Kel menty renh-rnem tyarleweyew, alakenh irraynteyew arrpemar. Ingwer-rneman mwerr-rnemar anayntemar. Kel mwerr, menty rernem anayntey alakenh. Ingwer-rnemelan Akgey apent-ayntem arraty-angkwarrarl. Kel menty rernem anayntey alakenh arrpemar.”

<sup>12</sup> Jesus ranem angkew, “Ayenh aweyew! Ayengar atwarreyneyenharl ahern-warl alerl-anteyarl. Atha ingkerrenh-antey rnkerneyew, renh-rnem ayerneyew-anem. Athap mwanty-antey ayerneyew, nthakenharl rernem anenh ahern-itwew. Ingwer-rnemelan ayenh arraty-angkwarr apentenh, mwerr-angker mpwaremel. Kel ikwer-rnem atha mwerr-angker antheyew. Ingwer-rnemanap atyeng awelhey-angenharl, apmwangkwarrarl anenh. Kel ikwer-rnem atha apmwa antheyew. <sup>13</sup> Ayengan arrwekel anenh. Awank ayeng anenh, ahern nhenhan arnwarney-angenhel-antey. Ahern nhenh-then alker nhenh-then aleth-antey ywerrenheyenharl, ayengan iteth intemar anaynteyenh.” Alakenh Jesus-an atyeng angkew.

<sup>14</sup> Arnkwa mwerr-angker ikwer-rnem-wenh lhewenty-penh-apeny, Jesus-ewarl awelheyel-rneman irrngerney aneyel. Rernemap arraty-anem aneyel ikwer-angkwarr. Ra

renh-rnem tyarleweyenh, keyt-angkwarr tawen Jerusalem-warl aylpenheyew, intem-antey ikwer-itwew aney-alpeyew. Rernemap alhewer alhem arwerl itetheley-angker-warl, amern ikwer-they arlkwaynteyew. <sup>15</sup> Ingwer-rnemanap arrangwarl, arengk-rnem-apenyarl. Ingwer-rnemelan pwentyel aylenh, arntety mpwareharl. Ingwer-rneman apmwangkwarr ayntenh akngerr-itwewarl. Ingwer-rnemelan atwenh ipmew-anteyarl. Ingwer-rneman kwenerrenharl ilengem apmwamwam-rnemew apwert-penhew arwerl-penhew. Ingwer-rneman irrtwyerl-amperney-angker-rnemar. Apmwa yanh-rneman nthakenh aylpenhey-angenh tawen ikwer-warl. Rernemap aketh-itwew anerl-aneyenh intem-antey.

<sup>16</sup> “Ayengan Jesus, athap antyerl atyenh thwewnew Christian arrewantherr-warl, angka nhenhan ilaynteyew. Arrantherr apmer 7 weth-rnem-itwew aneyel. Ayengan atyetyart David-wenh-anteyarl. Ayengap arenpeng, antyarr ilkwapeny, ingwepenharl tyerrelhem.”

<sup>17</sup> Inweng Mwerr-angker-then yep-yep akelywenh anewikw-then ratherr angkem-anem, “Apetyenh-arey!” Angka nhenh aweyel-rneman angkem, “Apetyenh-arey!” Ingwerenty apek angkethakwerrem, ra alhewer apetyeyew, kwaty itetheley-angker antyweyew.

<sup>18</sup> Mwanty-antey awelhenh-arey! Angka nhenhan Akngey-wenharl. Ran angka ingwerwenh-wenyarl, arrangkw. Impenarlap ran. Nthakenh ingwerentyel angka nhenh ingwerlkwereley-angenh. Nthakenh ingwerentyel

angka ingwer-anem ikwer-itwew pweyteley-angenh, arrangkw. Ingwerentyel apek ar-  
rkernem, angka nhenhan ingwer-lkwereleyew,  
Akngeyelanap arntety anthem, pwek nhenh-  
itwewarl atha ingkwernew-apeny. <sup>19</sup> Nthakenh  
ingwerentyel angkernem iparey-angenh, ar-  
rangkw. Angka ingkerr-antey ilaynteyew. Ing-  
werentyel apek angkernem iparem, Akngeyelanap  
renh artwerelem, ra tawen mwerr-angker ikwer-  
warl alhewerr. Athan angka tawen ikwer-akert  
ilew pwek nhenh-angkwarr. Nthakenh ra alhey-  
angenh arwerl itetheley-angker-warl, amern ar-  
lkweyew, arrangkw.

<sup>20</sup> Jesus ranem angkew, “Angka nhenhan in-  
ngarl.” Rap angkew arrpemar, “Ya, inngarl  
ayeng atwarrerneyenh ahern-warl alerl-antey.”

Atharl John-el renh awew, alakenh angkenty,  
ayengap angkew, “Ya wenh, arratyarlap ran!  
Atyetyart Jesus-ay! Alerl apetya!”

<sup>21</sup> Atha Atyetyart Jesus Christ ayern-ayntem,  
Akngey-wenh-rnem arntarnt-araynteyew intem-  
antey mwanty.

Kel-antey.

**Alyawarr Bible**  
**Portions of the Holy Bible in the Alyawarr language**  
**of Australia**

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

---

PDF generated using Haiola and XeLaTeX on 9 Mar 2024 from source files dated 10 Nov 2023

284d4e02-292d-5bd8-a8a6-8360a307b937